



3 1761 06836929 7

Seyyid, Mehmed
Hilāfetin māhiyet-i
şer'iyesi

DR
589
S48







لازمدر . بوده اوزون اوزادی به تدقیقه محتاجدر . قاش یا پالم دیرکن
 کوز چیقارمایلم ، متین و صاغلام اساسلر اوزرنده یورویلم . تکرار
 کبرویه دونمیهلم . ایشته بن بیلدکلریمی ، قناعتلریمی بوتون صمیمیتله
 اک آچیق بر صورتده عرض ایتدم . آرتق اوتوسی سزه عائددر . هرشی
 قراریکزه وابستهدر . مساعده کزله سوزلریمه نهایت ویرهیم (تشکر
 ایدرزسلری ، آلقیشلر)

~~.....~~
~~.....~~
~~.....~~
~~.....~~

۲ مار ۱۹۰۷

~~.....~~

بشقه بر فرق یوقدر . نهوت ، معروفده عرف دیمکدر . فقط اوده
بومعناده در . بن اصول فقهه دائریازدیغ والآن بدیتره مدیکم بویوک بر اترده
بو مسئله لری اوزون بویلو ایضاح ایتشمدر . آرزوایدنلر بنم او کتابه مراجعت
ایده بیلیرلر . مطبوعدر . طلبه جمعیتی طرفندن طبع ایدلمشدر . دارالفنونه
طلبه جمعیتی طرفندن صاتیلمقده در .

صوك سوز اوله رق شو جهتی ده عرض ایدیم که اصلاحات عدلیه
نامی آلتنده علی العجله بر قانون یا یق دوغر واولاماز . مضر در . آلمانلر
صوك قانون مدنیلرین آنجق اون بش سنه ده وجوده کتیره بیلدیلر .
مملکته ، ملتک عرف وعادته ، ملتک بنیه اجتماعیه سنه اویغون قانونلر
یا یق قولای برشی دکدر . مختلف دولتلرک مختلف اصول و قوانینی
وار . غربک عرف وعادتی وحقوقی اولدینی کی شرقک ده ، مملکت مزک ده
عرف وعادتی وقواعد حقوقیه سی واردر . بونلری اوزون اوزادی به
تدقیق ایتک ، نه تودایتک ، دوشونمک ، هانکی قاعده لرك ، هانکی
احکامک مملکت مزه ، ملت مزک شرائط اجتماعیه سنه ، احوال حیاتیه سنه
اویغون اولدینی تنبیت ایلهمک ایجاب ایدر . بویله یاپیلما یوبده علی العجله
کلشی کوزل بر قانون یاپیله جق اولور سه فائده یرینه مضرت حاصل
اولور . صوکره صیق صیق ، ایکی کونده بر تعدیله مجبور قالیر سکرز .
بن سزه بر آیده بویوک بر قانون ، دولتک قانون مدنیسی بیله کتیره-
بیلیرم ، نه یاپارم ؟ آلمان ویا اسویچره قانون مدنیسی ترجمه ایتدیره رک
هیئت علیه کزه تقدیم ایده بیلیرم . لکن اوکا تورکیه قانونی دینمز . محترم
سراج اوغلی شکری بکک تعبیری وجهله تورکک روحندن
دوغان قانون دینمز ، آلمان ویا اسویچره قانونی دینور . آلمانیا
و اسویچره باشقه ، تورکیه باشقه در . تورکیه ده تورکیه قانون

بویا کاشد . بن بومسئله یی اوزون مدت ، سنه لرجه تدقیق ایتدم .
 مسئله ده اشعریلرله یعنی شافعی علماسیله ماتریدیلاک یعنی حنفی علماسنک
 فکرلری بر رینه قاریشیور . بوی تفریق ایتمک لازمدر . شافعی علماسی
 طرفدن یازیلان تفسیرله ، مثلاً (قاضی بیضاوی) تفسیرینه باقارسه کز
 عرفک شرعاً تحسین اولان شیدر دیه تفسیر ایدلیدیکی کورورسکیز .
 حالبوکه حنفیلر طرفدن یازیلان تفسیرله ، مثلاً حنفیلرک الک بویوک
 محققلرندن و اصول فقه اماملرندن اولان جصاص ابوبکر رازینک
 (احکام القرآن) نامنده کی تفسیرینه باقارسه کز عرفی عقلاً تحسین
 اولان شیدر دیه تفسیر ایتدیکی کورورسکیز . بو مباینتک
 سببی (حسن و قبح) مسئله سیدر . بو فلسفه اسلامیه ده پک مهم بر
 بر بحثدر . الیوم اوروپا فیلسوفلری ده بو بحث ایله مشغول اولمقدردر .
 بوی سزه ایضاح ایتمک ایستهم ، اوزون کیدر ، بونک یری بوراسی
 دکلدز . شو قدر سوبلیه یم که عرف عرفاندن مأخوذدر . ماتریدیله
 کوره یعنی فقهای حنفیه کوره عقل و عرفانک تجویز ایتدیکی شی
 دیمکدر . عادته آره سننده شو قدر بر فرق وارد که عادت باطل
 اوزرینه ده تأسس ایده بیلیر . باطل و مذموم شیلر ده عادت اولابیلیر .
 نته کیم بر چوق قنا شیلر بین الناس عادت اولدینی کی . لیکن عرف ،
 عرفان اوزرینه مؤسسدر . باطل اوزرینه تأسس ایتمز . مردود
 و مذموم شیلر عرف دینمز . شو حالده عرف ایله عادت آره سننده
 عموم و خصوص مطلق واردر . عرف اخص ، عادت اعمدر . یعنی
 هر عرف عادتدر اما هر عادت عرف دکلدز . بعض عادتله عقلاً مقبول
 اولدینی ایچون عرفدر . فقط بعض عادتله عقلاً مردود اولدینی
 ایچون عرف دکلدز . ایشته عرف ایله عادتک آره سننده بو فرق واردر ،

ووحندن دوغان قانونلر ایستهرز (دیمشدی . بن او جلسه ده بولمادم
صوکره غزته ده او قودوم . پک دوعرو سویله مش . تصدیق ایدرم .
تورکک عرف وعادته او یغون قانونلر ایسترز دیمک ایستور دکی ؟
سراج اوغلی شکری بک (از میر) — اوت اوت . . .

عدلیه وکیلی سید بک (دوامله) — قرآن کریم ده بویله سویلیور .
بر آیت جلیله واردر . اجتماعی و حقوقی بر وجیزه ، بردستور حکمتدر .
باقیکز قرآن کریم نه دیور : (خذ العفو وأمر بالعرف واعرض عن
الجاهلین) دیور . معناسی عفو ی اختیار ایت ، عرف ایله امر ایله ،
جاهلردن اعراض قیل دیمکدر . (آلفیشلر) ایشته کور ویلیور که حضرت
قرآن عرف ایله امر ایت دیور .

اقدیلر ! بوتون شرق و غربک ، بوتون اوروپا حقوق شناسلرینک ،
بوتون فیلسوفلرک اتفاق ایتدکری بر شی واردر که اوده بر مملکت
قانونلری او مملکتک عرف وعادته او یغون اولماسی قضیه سیدر . قانون
وضعنده اساس بودر . بر قانون مملکتک عرف وعادته موافق اولمازسه
او قانون بایدار اولماز . چونکه حقوق دیمک عرف وعادت دیمکدر .
بر مملکتک احکام قانونیه سی ، قواعد حقوقیه سی او مملکتک عرف
وعادتندن دوغان و او عرف وعادتک تبدیلی ایله تبدل ایدر .

لکن عجبا بو آیت جلیله ده کی (عرف) کلمه سی بو کون لسانمزد
زبانزد اولان عرف وعادت معناسنه میدر ؟ آه ! دردلرم بویو کدر .
بو آیت جلیله حقیله تدقیق ایدلمه مش ، معناسی ایشله نه مشدر . تفسیرلره
باقارسه کز بر رینه مباین بشقه بشقه معنالر ویرلدیکنی کورورسکیز .
بو آیتده کی عرف معروف معناسنه در ، منکرک ضدیدر . خلقک لساننده
دوران ایدن عرف وعادت معناسنه دکدر دیرلر . حالبوکه اقدیلر

سید بك (از میر) دوامله — سوزلر مده اصلا ریاکارلق ، بر مقصد خفی یوقدر . بیلدکری می کمال صمیمیتله سزه عرض ایتدم . مقصدم معزز دینک حقایقی اولدینی کبی بیلدیرمک ، بو صورتله اسلامیتی یارواغیاره قارشى اعلا ایله مکدر .

افندیلر ، اهالی بو حقایق آکلامازمش ، بیلمزمش . آکلاتم ، بیلدیرم ، وظیفه مزدر . اهالی آکلاماش ، بیلمه مش ایسه قباحث اونلرده دکل ، آکلتیانلرده در ، بیلدیرمینلرده در . بوندن صکره اولسون آکلاتم ، ایقاظ ایدم ، ارشاد و تنویر ایدم و بو زواللی مملکتی آرتق یوروتم (براو و سسلری) خلافت ، خلافت دییه چوکش کیتمش . خراب و تراب اولمش . نه مالز ، نه جائز ، نه ملکمز قالمش . بوتون مملکت یوقسوللق ایچنده قالمش . بومی خلافتک محاسنی افندیلر ؟ ! . (براو و سسلری) آرتق یورویم ، دیریلیم . بوتون عالم مدنیت آلمش یورومش ، طریق ترقیده دیو آدیملریله کیدیور . بز بونلرک آرقه سندن بوینی بو کوک یتیم کبی باقوب باقوب ده (کوچدی کروان ، قالدق طاغیر باشنده) می دییه لم ؟ (خنده لر) دوغروسی انسان متأثر اولیور . نه یالان سویلیهیم عینی زمانده انسانه حدت ده کلیور . نه عجایب شی ! دین اسلام بو قدر عالی و ترقیروور بر دین اولسونده بز مسلمانلر ملل واقوام ایچنده اک کیده قالالم (خنده لر و آلقیشلر)

افندیلر ، سوزلر مه نهایت ویرمزدن اول زمانمزده ، هله شو صرهدده بك مهم اولان بر مسئله حقنده مساعدده بو یوریکزده بر ایکی سوز سویلیهیم . (سویله سویله ، صباحه قدر سویله دیکله رز سسلری) بوندن اوچ بش کوند اول بر جاسه علنیده ، هیئت عمومیه کزده محترم از میر مبعونی آرقداشم سراج اوغلی شکری بك (تورکک

سوزی عکسنه چویرم ، اسلامیت شیمدی ترقییه مانع اولیورده ، او وقت اولیورمیدی ؟ بونک هیج بری دکل . افندیلر ، زما نمزده ، مملکت مزده ترقییه مانع اولان حال حقیقی اسلامیت دکلدر ، جهلدن ، کور کورینه تقلید جیلکدن نشأت ایدن بو کونک نابمحل ذهنیتیدر . زما نمزده دین اسلام پک غریب قالمش ، خرافات ایله دولمشدر و بو خرافات عالم اسلامه ادیان سائرهدن ، اقوام سائرهدن سرایت ایتمشدر . یوقسه حقیقی دین اسلام خرافاتک ، افکار باطله نک اک بویوک دشمنیدر . اساساً دین اسلام خرافاتی ، اعتقادات باطله یی کوکندن ییقمق ایچون کلشدر . نته کیم وقیله ییقمشدی ده . فقط صوکرملری شورادن ، بورادن عالم اسلامک ایچنه بر چوق خرافات کیردی ، نتیجه ده دین اسلام بوتون بوتون غریب قالدی .

بلا تردد دیه بیلیرم که بو کونکی دین اسلام بشقه ، عصر سعادتده کی دین اسلام بشقه در . حقیقی دین اسلام فطری ومنطقی بردیندر . خیالاتی ، خرافاتی بر طاقم افکار باطله یی هیج سومز ، بالعکس اونلردن نفرت ایدر . بر آز اولده سویله مشدم ، حضرت پیغمبرک اک بویوک دعاسی (اللهم ارنا الاشياء کما هی) یعنی یاربی بزه حقایق اشیایی اولدینی کبی کوستر . دعاسی ایدی . نه کوزل ، نه بویوک دعادر . انسان حقایق اشیایی اولدینی کبی بیایرسه دهانه ایستر ؟ اک بویوک حکمت ، اک بویوک علم ومعرفتده حقایق اشیایی اولدینی کبی بیلیمک دکلیدر ؟ ایشته افندیلر ، خلافت واسلامیت حقنده بیلدیکمی ، آکلادیغمی سزه سویله دم . بویکرمی اوتوز سنه لک اوزون ویوریجی سنه لک محصل تبعاتیدر .

یحیی غالب بک (قیرشهر) — الله سزنی ملتتمزله برابر ، پایدار ایتسون !

ایچون هېسنى برر برر تعداد ايتمك ايستهيم. اساساً اونك سويله مسنده حاجت يوق. ذاتاً بزجه معلومدر. ليكن اغيارلساندن ايشيتمك خوشه كېده جي ايچون مختصراً اولسون اونك سوزلرني و حسن شهادتي تقديركار افاداتي نقل ايتمكي موافق كوردم. افنديلر! شوراسني عرض ايديمكه شرقيه ، عالم اسلامده ، مدنيت اسلاميه علوم وقونه خدمت ايدن علمايك اكرتيسي توركدور. ايچلرنده يك بويوك فيلسوفلر ، يك بويوك متفكر و متبحر عالمر ، بويوك حقوقچي فقيهلر واردور. بر طاقم ظالم و مستبد حكمدارلر ك ظلم و استبدادي نتيجه سنده بويله زبون خراب ، جاهل برحاله كلش اولان سمرقند ، بخارا ، نيسابور ، بغداد ، بلخ كې شهرلر و قتيله اوچر بشر ميلون نفوسي حاوي جسيم مملكتلر ايدى. مشهور اديب اعظم كال بك مرحوم بر اثرنده بوشهرلر ايچون « هر برى پارس ، لونده كې ، ديهرك بونلر بونلر پارس ولونده درجه سنده بويوك شهرلر اولديغني سويلر . بن مرحومك بو اثرني او قوديم زمان بوسوزيني يك مبالغه لي بولمش ، اينانماشدم . صوكره لري آثار عربيده كورونجه مرحومي تصديق ايتدم .

افنديلر! بعض آثار عربيده كوردم . خراسانله افغانستان آره سنده بولنان و « بلخ ، دينيان شهر و قتيله (۶) ميلون نفوسي حاوي جسيم بر مملكت ايش . ايچنده آلتى يوز قدر قبه لي و مناره لي جامع وارمش . بوكون ايسه احتمال بوشهرك انقاضي بيله قالماشدور .

شمدي ، صورارم سزه ، اولوقت مدنيت اسلاميه اودرجه ده مترقي و عالم اسلام اونسېته ده معمور و متمدن ايكن شمدى نهدن خرابه زاره دونمش اهالي سي جهل و ناداني ايچنده قالمشدر ؛ بونك سببي نهدر ؟ اسلاميت اووقت ترقي به مانع اوليوردي ده شمديمي مانع اوليور و ياخود

دینلردر . خصوصیه قتولیک دیندر . اسلام دینی دیکدر ، دییور
 صوکره اندلسده وقتیه علمای اسلام طرفندن قسماً یکی باشند ایجاد ،
 قسماً اکمال ایدیلن علوم و فنونی برر برر تعداد ایدیور . مثلاً مثلثات
 کرویہنک ، کره مسطحه نک تمامیه اسلام علماسی طرفندن ایجاد ایدلدیکنی ،
 اسکی یونانیلر زماننده بونلرک ایجاد ایدلمه مش اولدیغنی سویلر ، ایکی
 واوچ (س) لی جبر دستورلری ، حساب تفاضلی و حتی لغاریتمه یی ،
 فن صیدلانی یعنی اسپنچیارلق فنی ، پہلوان ونخود یاقیلربی و بونلره
 مائل دها برچوق اصول و قواعد فنیہ یی دوعرودن دوعرویه وابستاء
 اسلام علماسنک ایجاد ایلدیکنی سویلر . انکسار ضیایی ، ابو بکر
 رازینک کشف ایتدیکنی و کره ارضک کروییتی کذلک اسلام علماسنک
 کشف ایتدیکنی سویلر و کره ارضک ابتدا بغداد جوارنده سنجار
 اوواستنده اصول فنیہ سی دائره سنده اولچولدیکنی و اوروپالیرک کره
 ارضی اولچلرک بولدیغنی مقدار ایلہ اسلام علماسنک بولدیغنی مقدار آراستنده
 یک جزئی برفرق اولدیغنی سویلر . ابوالقاسم دینلن بردوقتورک بلجبقا
 قرالی طرفندن کندیسنی تداوی ایچون صورت مخصوصده جلب
 ایدلدیکنی و مشارالیهک ایکی دفعه بلجبقایه کیتدیکنی ، حتی بردفعه سنده
 آلتی آی قدر برمدت بلجبقاده اوطورارق قرالی و دیگرلربی
 تداوی ایتدیکنی ، اوروپاده علم مراقیسی بر چوق کنجلرک
 و حتی بالآخره بابا اولان بر ایکی ذاتک تحصیل علم ایچون
 اندلسه قدر کتدکلربی ، انکلزلرک فنون بحریہ یی اندلسده تحصیل
 ایلدیکنی اوزون اوزادی به تعداد و یضاح ایدر . ایشته بونک ایچوندرک
 انکلزجه اصطلاحات بحریہ نک اکثریسی کلمات عربیہ دن اخذ ایدلمشدر .
 دها بخصوصده یک چوق بیاناتده بولنیور ايسه ده اوزون کیده جکی

بولونسون ، هر كيمك آغزندن ايشيديليرسه ايشيدلسون ايشته اوسوز ، ايشته او كلام حقيقت ، ايشته او دستور مسلمانك غائب ايدوبده آراديني كندى ماليدر . هيچ تردد ايتمه سون ، هان آلسون . نرده بوانورسه بولونسون ، هر كسدن زياده بر مؤمن اوکا مستحقدر . هر كسدن اول آلسون ؛ اونك اوز ماليدر . باقكز ، بو نه يوكسك ، نه عالي بر سوزدر ، دلالت ايتديكي معنا و مال اعتباريله ، مضمون اعتباريله نه بويوك بر دستوردرد . ايشته بو حديدن ده آكلاشيليوركه اسلاميت معارفه ، حقائق اشيايه پك بويوك قيمت ويرييور . حقوقده حریتپرور بر دين اولديني كبي علوم و فنونده حریتپرور بر ديندر . عقل و منطقي و معارفی پك زياده سور . جهالتدن و كورو كورينه اوتة كنه بريكنه تقليد جيله كدن ده پك نفرت ايدر . بز بابالريمزى بويله بولدق . آنلك ائرندن آيرلمايزدين متمردينه حضرت قرآن (اتم و آبائكم فى ضلال مبين) يعنى سز و بابالريكز بارز و آشكار ضلالتده سكزدييور . افنديلر ! بر وقتلر اوروپا ظلمت جهل ايچنده ايكن ، شرق مدنيت يوللارنده خيلي ايلرله مشدى . او وئتلر كره ارض اوزرنده اك مترقي واك متمدن يرلر عالم اسلام ايدى . بوتون اوروپا از جمله انكليزلر تكميل علوم و فنونى شمدى اسپانيادينان انداسدن آلمشدر . آمريقا دارالفنون مدرسلرندن (دراپور) نزاع علم و دين ناميله بر كتاب نشر ايتمشدر . توصيه ايدرم ، مهم بر كتابدر او قويكز . بو آدم بو كتابنده برقاده ، بردماغده دين ايله علم اجتماع ايدومز . عالم ايسه متدين دكلدر ، متدين ايسه عالم دكلدر دييور و بو موضوع اوزرنده مطالعاتى ، تدقيقات تاريخيه سنى يورود دييور فقط ينه كنديسى او كتابده صراحة دييور : « بنم بو كتابده ديندن مقصدم دين اسلام دكلدر . ديكر

حضرت قرآن عقل و منطق و دلائل علمیه پهك بویوك قیمت ویریور
 افندیلر ! اسلامیت معارفله توأمدر. حکمت و معرفدن هیچ بر
 زمان آیریلماز . هپ بیلیرسکز ، مثلاً (علم ولوکه چینده اولسه دخ
 کیدیکز، تحصیل ایدیکز) و (علم و معرفتی بشیکدن قهره قدر تحصیل
 ایدیکز) حدیثلرینی هپ بیلیرسکز . بیلیمین یوق کییدر . سزه بر
 حدیث دهانقل ایدیم باقکز بونده جناب پیغمبر افندیز نه دیور : (الحکما
 ضالة المؤمن حیثما وجدها فهو احق بها) بویوریور. بو حدیث شریف
 احادیث صحیحه و حسنه دندر . مشهور کتب ستمدن (سنن تیرمیزی)
 ده و دیگر حدیث کتابلرنده موجود در و پك مشهور در. مختلف تعبیرلرله
 روایت ایدلشدور . او یله موعظه کتابلری حدیثلرندن دکلدر. عبدعاجز
 او یله موعظه کتابلرینك حدیثلرندن بحث ایتیم . اك معتبر حدیث
 کتابلرنده کورمدکجه اوکی ضعیف حدیثلردن بحث ایتیم . بو حدیث
 شریفك معنای منینی شودر : « حکمت مؤمنك آرامقده اولدینی اوز
 مالی در . اونی نروده بولورسه آنی آلمغه هر کسدن زیاده مستحقدر ،
 ایشه بو حدیثك معناسی بودر . (حکمت) حقایق اشیایه موافق
 اولان کلام ، علم و معرفت دیمکدر . (ضالة) نه دیمکدر بیلیرمیسکز ؛
 انسانك غائب ایدوبده آزادینی مال دیمکدر. مثلاً بر چاقینی اوزر کزدن
 دوشورورسکز آرامغه باشلارسکز . ایشه او سرك ضاله کزدن .
 تورکجه سنی طونالی حلمی بك قارده شمز سویله سون .

طونالی حلمی بك (زونقولداق) — (یتك) در .

سیدبك (از میر) دوامله — ایشه جناب پیغمبر بویله بویوریور
 حکمت اولان سوز ، حقایق اشیایه موافق اولان برکلام ، حقوقی
 اجتماعی ، فلسفی ، اقتصادی و اخلاقی بر دستور . هر نروده بولورسه

حدیثك معناسی شود: (حق زده ایه سن ده اونكه برابر اوراده بولون ، اوندن آیرما و سكا شبه و یرن شیلوك حقیقتی عقلکه تمیز ایت . چونكه جناب حقل سنك علمنه اولان حجتی سنده در ، کند کده در و اونك فیوض و برکاتی ده سنك زد کده در .) ایشته بو حدیث شریفك معناسی بود . نه عالی سوزدر ، نه قدر معنیداردر و عقله نه بویوك قیمت و یریور؟ ذاتاً قرآن کریم ده باشند باشه عقلی و ارباب عقل واذعانی تحیل ایدر . آنك ایچون اسلامیت ، عقل و منطق ایله ایله توأمدر . بر آیت کریمه ده (فبشر عباد الذین یستمعون القول فیتنبعون احسنه) بویوریلور . معنای منیفی (مختلف سوزلری ایشیدوبده آنلرك اك كوزلنه اتباع ایدن قوللریمی مكافات الهیه له تبشیر ایت) دیمکدر . بو آیتك آلت طرفنده ده (ایشته بولردرکه اونلری جناب حق مظهر هدایت ایله مشدر و ایشته آنحق ونلر اولوالالباب یعنی اصحاب عقل واذعاندر) دینیور . ایشته كرك و حدیث و كرك بو آیت تقلید چیلکی ، اوته كنك بریكنك مقلد لکنی ؛ یعنی دلیلی بیلمکسزین علی العمیا هر کسك ولوکه علمادن اولسون قوال مجرده سنه اتباعی منع ایدیور . دائماً هر شیئك عقل و منطق ایله ، دلائله مستند محاکات عقلیه ایله تدقیق ایدلمسی لزومی کوستریور . بر آیت جلیله ده [قل هاتوا برهانکم ان کنتم صادقین] بویوریور . یعنی حضرت پیغمبره خطاباً (سوزلریکزده صادق ایه کز دلیلکزی براد ایدیکز) بویوریور . برهان دلیل قطعی دیمکدر . اصطلاحده مقدمات یقینیه دن تشکل ایدن دلیله دینیرکه دلیل قطعیدر . دیگر بر آیت جلیله ده (ولا تقف مالیس لك به علم) بویوریور که (علمك لاحق و لمادینی شیئه افتفا ایتمه) دیمکدر . بك آچیق اوله رق کوریلیورکه

انسانی خطبه ده عثمانی پادشاهلرینک اسملرینی ذکر ایدرکن خلیفه ابن
الخلیفه دیمز (السلطان ابن السلطان) دیر . الخلیفه ابن الخلیفه دین
خطیب هیچ کوردیکزمی؟ خطبه لرده خلفای راشدینک یعنی ابوبکر ،
عمر ، عثمان وعلینک اسملرینک ذکر ایدلمسیده بوقیلدندر . یعنی بوده
صرف سیاسی بر مسئله در . شیعیله قارشو ذکر اولنور و بو خطبه نیک
اوقوندینی برده کی اهلینک اهل سنت اولدینی بونکله اعلان ایدلمش اولور .
ایرانه کیدرسه کز اوراده ده جامعلرده خطیبلر ابوبکر ، عمر و عثمانک
اسملرینی ذکر ایتزلر . خلاصه بو کجی شیرلر صو کره دن احداث ایدلمش
شیرلر در . اصل شریعت اسلامیه ده بویله شیرلر یوقدر . ایسته افندیلر !
خلافت و آنک تفرقاتی حقنده سزه پک چوق ایضاحات ویردم . بو
ایضاحمله آرتق خلافت مسئله سنک ماهیت شرعیسی تمامله آکلا
شلمشدر صانیرم . شیمیدی ده مساعدده ایدکده بر ایکی سوزله مقدس
دینی یار و اغیاره قارشو اعلا ایدیم .

...

محترم افندیلر ! اسلامیت غایت عالی بر دیندر . معارفی ، ترقی بی
پک سور . عقلدن ، منطقدن هیچ ایرماز . بر یوزنده دین اسلام
قدر حریت پرور ، ترقی پرور بر دین یوقدر . بوتون احکام دینیله علوی
معالیاتی محتویدر . استهداف ایتدیکی غایه مکارم اخلاقی ، فضائل بشریه بی
تأسیس و تأمین ایتکدر . حضرت پیغمبر اکرم صلی الله علیه و آله و سلم
بعثت لا تتم مکارم الاخلاق (بویوریور . یعنی بن آنجق مکارم اخلاقی
اتمام ایچون بعثت اولوندیم دیور و بر حدیث شریفده ده عقله (حجة
الله) اطلاق ایدیور . باقکمز نه دیور : (کن مع الحق حیث کان
ومیزما اشتبهه علیک بعقلک فان حجة الله علیک نیک و برکانه عندک) بو

(امیرالحج) مسئله سی ده بویه در ، دین اسمی ذکر ایله دیکم
خواجه شکری افندی امیرالحج تعیینی ایچون ده خلیفه نك وجودینه
لوزوم کوستریور . حالبوکه اصلا اويله برلوزوم یوقدر . بوده انضباط
و آسایش مسئله سیدر . اوتهدنبری حجاج آره سنده امنیت و آسایشی
محافظه و نزاع و اختلافی فصل ایچون بر ذاتی امیرحج تعیین ایدر لر مش
مسئله بوندن عبارتدر . بوده وظائف حکومتدن بروظیفه در و هیچ بری
لوازم خلافتدن دکدر .

خطبه لرده خلیفه لرك ، پادشاه لرك اسملرینك ذکر ایدلمسی کیفیتنه
کلنجه بو آرتق بوسبتون صوکرده دن احداث اولمش بر کیفیتدر .
خطبه نك قطعاً شرائطندن دکدر و خطبه ایله دینی اولمق اوزره هیچ
برمناسبتی یوقدر . صرف سیاسی واداری بر کیفیتدر . خلفای راشدین
زماننده خطبه لرده هیچ بر کیمسه نك اسمی ذکر اولونمازدی . بر آرز
اول سویله مشدم . خطبه ، نطق دیمکدر . اونده ذکر ی لازم اولان
شیلر سیاسی ، اجتماعی ، اقتصادی ، اخلاقی نصیحتلر ، مسئله لردر .
خطبه ، خلقی ایفاظ وارشاد ایچون ایراد اولنور . یوقسه بر ذاتك
اسمی ذکر ایتك ایچون ایراد اولونماز . دولت امویه ده خطیلر
خطبه لرده حضرت امام علی یعلنت ایدر لر دی . بونی صرف بر پروپاگاندا
اولمق ، خاق حضرت علیدن صوغوتمق ایچون معاویه احداث ایتشدی .
حضرت علینك حکمران اولدینی یرلرده ده خطیلر ، اموی خطیلرینه
مقابله اولمق اوزره حضرت علی یهدما ایدر لر دی . ده اسکره لری طوائف
ملوک ظهور ایتدیکی زمانلرده هر یرده خطیب اویره حاکم اولان سلطانك اسمی
ذکر ایدر اولدی ، بوندن مقصوده اویرك هانکی سلطانك ، هانکی
حکمدارك حوزه حکومتی داخلنده بولندیغی کوسترمکدر . بزده ده خطیلر

ایتمشدر. بوضو رتله تصحیحی لازمدر. افندیلر! برسنه دن بری مملکتتمزده خطیبلر یالکیز شرعیه و کیلی طرفندن تعیین اولونیور. شمیدی برسنه دنبری مملکتتمزده قلنان جمعه و بایرام نمازلری صحیح دکلدرمی دنیله جک ؟ بو، خطای عظیم اولور. لازم اولان خطیبک، جمعه و بایرام نمازلرینی قیلدیره جق امامک حکومت طرفندن تعیین ایدلمه سیدر. بو حاصل اولدقدن سوکره باشقه برشیئه لزوم یوقدر.

اذن امام مسئله سنه کهنجه : افندیلر! بوده یاکلشدر. (اذن امام) تعبیرنده کی امام لفظی الفله امام دکل عین ایله عامدر. یعنی ترکیب اضافی ایله اذن امام دکل، ترکیب توصیفی ایله (اذن عام) دیمک لازمدر. ایشته دوغروسی بودر. یعنی جمعه نمازی صحیح اولمق ایچون اذن عام شرطدر. بو اذن عامدن مقصوده جامع و یاقلعه قپولری هرکسه آجیق بولنسی، هرکسک او جامع و یاقلعه دروننده جمعه نمازینی قیلیمغه مأذون بولنمیدر. چونکه جمعه و بایرام نمازلری شعار اسلامیه دندر. آنلرک علناً اظهاری لازمه دندر. ایشته جمعه و بایرام نمازلرینک همتنده اذن امامک شرط اولماسی بو حکمته مستنددر. بناء علیه بر خلیفه، بر پادشاه، بروالی و یا بر قوماندان یالکیز کندی معیتله جمعه نمازینی قیلیمق ایستیوبده جامع و یا خود قلعه قاپولرینی قاپاندیره رق خلقی دخولدن منع ایله سه اونماز صحیح اولماز. ایشته بومسئله یی ده بوضو رتله تصحیح ایتمک لازمدر. تأسف اولور که عالم کچین بر چوق ذوات بومسئله لری پک بسیط اولدقلری حالده ینه یاکلش بلله مشلدر. بو مسئله لر کتب فقهیه نک جمله سننده بو صورتله محرر اولدینی حالده بیلمم نصل اولمشده بونلر پک یاکلش، پک آجیق خطا اوله رق بلله نیلمه شدر. بوکا بر درلو عظم ایرمه دی. بن کتب فقهیه ایچنده شو سویله دکلامک عکسفی ادعا ایدن بر کتاب، بر عباره کورمندم.

تورکستانده فرغانه ایالتنک مرکز اداره سیدر . بو ذات، اورالرده
وسمرقند جوارنده نشر علوم اتمشدر . (هدایه) نامنده غایت فیاض،
غایت مبجل قیمتی بر کتابی واردر . الیوم مصرده طبع اولمشدر .
عالم اسلامده بو کتابی بیلیمین بر عالم یوقدر . بین العلمما حجتدر . آندن
صوکره یازیلان بوتون کتابلرک مرجمیدر . و مذهب حنفیده
اک موثوق، اک معتبر بر کتابدر . ایشته بو کتابده (جمعه نمازی بالذات
سلطان ویا اونک مأمور مخصوصی قیلدیر مق لازمدر) دینیور . بو کتابک
شرحی مشهور (فتح القدر) ده والیوم هر عالمک النده بولنان مشهور
(در مختار) ده (ولوکه اوسلطان بر شخص متغلب وحتی بر قادین اولسون
بأس یوقدر) دینیلیور . ذکر اولنان (هدایه) ده ده بوشرطک، بومسئله نک
عائی، اسباب موجب سی اولمق اوزره شویله دینیور : « و چونکه
جمعه نمازی جماعت عظیمه ایله ادا اولنور و بعضاً خطابت وامامته هوسکار
اولانلر طرفندن تقدیم و تقدیمه منازعه حاصل اولور . بعضاً ده بشقه
برسیدن دولایی نزاع و اختلاف ظهور اید بیلیر . بوجهتله امر فرضی
تتبیماً بوشرطه لزوم کورولمشدر ، ایشته بوسوزلر هدایه نک کندی
سوزلریدر . بئم سوزلرم دکلدیر . شبهه ایدنلر اورایه مراجعت ایتسونلر !
ایشته پک آچیق اوله رق کورولور که خطابت توجیهی مسئله سی، اویله
ظن اولوندینی کی خلافتک لوازمندن دکلدیر . مجرد انضباط و آسایش
مسئله سیدر . نزاع و شقاقی رفع ایچون لزوم کورولن وظائف حکو -
متدنذر . حتی مذهب شافعی به کوره جمعه نمازینک صحته بویله بر شرط
یوقدر . فقهای حنفیده سلطان اولمایان یرلرده خطیبی وامامی اهالی
کندیسی انتخاب و تعیین ایدر دیرلر . ایشته مسئله نک ماهیت حقیقه سی
بودر . فقط نصلسه مع الناسف بومسئله ذهنلرده پک یا کلش اوله رق تقرر

هیچ بر واسطه احتیاجی یوقدر . نه قرآند ، نه حدیثه بویه
بر شی بولامازسکن . بالعکس عکسی بولورسکن .

جمعه نمازی سیاسی بر عبادتدر . بایرام نمازی ده اویلهدر . اونک
ایچوندرکه بویوک شهرلرده وقصبهلرده قیلنور . کویلرده قیلنماز .
بزم مذهبهزده ، یعنی مذهب حنفیده کویلرده جمعه نمازی صحیح اولماز . مطلق
شهرده اوله جق . چارشوویازاری اولان قصبهلرده قلنه جق و ممکن اولدجه
بریرده ، برجامعه قلنه جق . آنک ایچوندرکه اوللری شهر ایچنده ویا شهر
کنارنده صورت مخصوصهده احضار ایدلمش میدانلرده قیلنیردی . اویرلره
نمازگاه دینور . حالا بعض شهرلرده نمازگاه دنیلن یرلر واردر .
صوکره افندیلر ! خطیب مملکتک اک بویوک ذاتی ، اک بویوک عالمی
اوله جق . خطبه ؛ سیاسی ، اجتماعی ، اخلاقی ، اقتصادی ، نصایحی ،
علمی ایضاحات وارشاداتی محتوی اوله جق . بناء علیه بویه بر خطبه
ایرادینه هرکس مقتدر اولماز . اوکا کوره خطیب بولمق لازمدر .
آنک ایچون اوئلده خطبه مسئلهسی مهم بر مسئله ایدی . خطبه
اوقومق و اوصورتله خلقه کنیدیسی کوسترمک ، افکارناسده بر موقع
طوتمق شبهه مزبویوک بر شرفدی . کندینه کووه ن هرکس بوکا هوس
ایده بیلیر . اونلرک طرفدارلری ده اوله بیلیر . بو اوقوسون ، خایر او
اوقوسون دییه آرلرنده اختلاف و نزاع ظهور ایده بیلیر . ایشته بو
اختلاف و نزاعه میدان ویرمه مک ایچون فقهای حنفیه خطیبک ، جمعه
نمازی قیلدیره جق اولان ذاتک سلطان طرفندن تعیین ایدلمش اولمسی
لازمدر دیمش لردر . دقت ایدیلیورمی ؟ بوراده خلیفه تعبیری یوق
سلطان تعبیری وار . تورکستانک اک بویوک عالملرندن ، فقهای حنفیه مک
اعاظمندن برهان الدین مرغینانی نامنده بویوک بر فقیه واردر . مرغینار

طونه لی حلمی بك (زونفولداق) — بر مشكام وار خواجه
افندی حضر تلی ، بر انسان جمعه نمازی قیلمق ایچون بشقه سنك
اذنی آلمغه مجبوریت وارمیدر ؟

سید بك (ازیر) دوامله — نهوت بو باده بر رساله کوردم .
چکن دوره انتخابیه مبعوثلرندن خواجه شکری افندیك کتابیدر .
کندیسیله تشرف ایده مدم . کندیسی کورمدیکم ایچون حال حاضرده
نه قناعتده اولدیغنی بیلمیورم . او کتابده [مذهبه مز مقضاسنه
جمعه وایرام نمازلرینك صحتی اذن امامه متوقف اولقله خطابتك مقام
خلافتدن توحیهی مقتضیدر] دینیور . کورولیورکه خواجه شکری
افندی ، بو مقامده ایکی شیدین بحث ایدیور . بری جمعه وایرام
نمازلرینك صحیح اولماسی ایچون اذن امامك شرط اولماسی ، دیکری ده
خطیبلك خلیفه طرفندن تعینتك لزومیدر . بویکی مسئلهك ایکیسی ده
یا کله شدردر . خطای فاحشدر . قسطمونی مبعوث محترمی خالد بك
افندی حضر تری ده « اها لیجه اویله تلقی اولونیور . خلیفه اولمازسه
جمعه نمازی صحیح اولماز دینیور » بویوردیلر . بر کره شونی عرض
ایدهیم که افندیلر ، دین اسلامده الله ایله قول آره س نه کیره جك بر
واسطه یوقدر . بو بر حقیقت اسلامیه در . نه شیخ ، نه مرشد ،
نه مجتهد ، نه امام ، نه ده بیلم کیم اصلا واسطه اولماز . اسلامیتده
روحانیت ، تشکیلات دینی یوقدر . پاپا ، حضرت عیسی نك لایخطی
وکیلیدر . حضرت عیسی نامنه امر ونهی ایدر . اسلامیتده بویله برشی
یوقدر . هیچ بر کیسه حضرت پیغمبرك تشریع احکامده وکیلی
دکدر . تشریعه نیابت جاری اولماز . اسلامیتده الله یولی آچیقدر . الله
ایله انسان آره سنده آچیق بر یول واردرد . هر کس اویولده کیده بیلیر .

کبی قوللانمشلر . برشی دییه مشر . بیلیرسکیز ، وقتیلله هر هانسی بر ذاتک ماللرینی مصادره ایدرلردی . شوبا بوکا ایسته دکلری اموالی ، اراضی بی پیشکش چکرلردی . اوروپادن اوتاندقلری ایچون مشهور کلخانه خط هایونی نشر اولوندینی زمان مصادره ملغادر دیمشله . مدنی بردولت حالته کیره جکیز ، آرتق مصادره ملغادر دیمشله و ۹۳ قانون اساسیسنده قویمشله در . حالبوکه او وقته قدر بوتون زنکیملرک ماللرینه ایسته دکلری کبی تصرف ایدرله ، ایسته دکلری کبی مصادره ایدرلردی . اهالی ماللرینی بوندن قورتارمق ایچون بر چاره اراغنه باشلامش ، بر آدم بویوک برزنکیملر اولورسه ، سیوریلیرسه در حال مالی مصادره اولونور . بونک اوکنه کچمه نک چاره سی نه در دییه اهالی قیورانغه باشلامش .

رجب بک (کوناویه) — هایدی وقف !

عدلیه و کبلی سید بک (ازمیر) دوامله — نه یاپسونلر طبیعی وقف اصولی ایی بر چاره بولدیلر . اقتدیلر ! ظن ایدر میسکیز که بو وقفلر خیر ایچون یاپیلمشدر ؟ خیر ! وقفنامه لره باقارسه کیز کورورسکیز ، اللی بیک لیرا قیمتند برمال ، سنه ده بش اون بیک لیرا واردات کتیرن املاک وقف ایدیلیور . فقط جهت خیره طوپو طوپو یوز لیرالقی بر مصرف اختیار اولونیور . مثلاً فلان سبیلله قرق اوقه قار ، فلان جامعہ سکسان اوقه زیتون باغی ، فلان مسجدده اوتوز قرق دانه موم شرط ایدیلیور . اوست طرفی اولادینه بطناً بعد بطن ، نسلاً بعد نسل اولادینک اولادینه شرط ایدیلیور . (خنده لر ، القیشلر) بونهدن ؟ چونکه مصادره ایدیلیور . مصادره دن قورتارمق ایچون بشقه چاره یوق . مقصدم تزییف دکلدر . حقایق تاریخیه بی عرض ایتمکدر .

حکومت مشروطه دینان حکومت بو قیلدندر . ملت هیچ بر ذاته
وکالت ویرمز ، یعنی بر خلیفه ، بر امام انتخاب ایتزسه خلافت یوق
دیمکدر . او وقت ده جمهوریت اولور . بوکا نه مانع واردر ؟ ملت کندی
ایشمی بن یاجم ، نه دن بکا باشقه سی جبراً یایدیرسون دیرسه نه دن
جائز اولماسون ؟ ملت دییور که خایر کندی ایشمی بن کندم کوره جکم .
نه وقت عاجز اولورسم او وقت خلیفه ویا امام نامیله بشقه سی وکیل
تعیین ایدرم . فقط شیمدی بن الحمد لله عاجز دکلم . رشیدی استیصال
ایتم . وکیله احتیاجم یوقدر . ملت اچون انافع بر شکل حکومت
دیمک اولان جمهوریت و اصول مشورتله کندی ایشمی کندم کوره جکم .
او حالده بوکا کیم نه دیر ؟ کیمسه برشی دییه مز . زیرا حق ملتکدر .
(آلفیشلر) قرآن کریم ده بونک جوازینه صراحت درجه سنده اشارت
ایدیور . (مسلمانلرک ایشی کندی آرالرنده مشورتله کورولور) دییور .
(آلفیشلر) ایشته باقیکز مسئله نه قدر بسیطلشدی . دوندی ، دولاشدی
بسیط بر مسئله حقوقیه اولدی . بو ، چوققلرک بیله آکلایه جنی بر مسئله
اولدی . بونی اعظام ایتک ، لزومندن فضله بو بولتمک و بوکا بشقه درلو
معنالر ویرمک ، خرافانه ، ماصالره قدر کیتمک و قورقونج بر حاله
قویمقده نه معنا واردر ؟ اوت ، بونک بر معناسی واردر ، اوده
کوره نکدر . افندیلر ! کوره نکدر . قفالر آلیشمش ، کوزلر آلیشمش ،
ذهنلر آلیشمش . باشقه برشی دکل .

طونه لی حامی بک (زونغولداق) — ذکی بکک قولاقلی
چینلاسون !

عدلیه وکیلی سید بک (دوامله) — مع الاسف هر درلو ظلملرینه
قاتلانلر ق آلیشمش ، مملکتی مالکانه لرینه چویرمشلر . ملتی اوشاق

ایشته افندیلر ، علی شعوری بك افندیك صورمق ایسته دكاری مسئله بودر . فقهاء یعنی اسلام حقو فجیلری ، خلیفه ملتك و کیلیدر دیر لر . چونكه ملت ولایت عامه یی اوکا تفویض ایتمیشدر . انتخاب طریقله تفویض ایتمیشدر . ملت اوئی انتخاب ایتمه سیدی ، او ولایت عامه یی حائز اوله مازدی . آنك ایچون ملت او ولایت عامه نك صاحبیدر و اصلدر . امور عامه ده تصرفات کندیسنه عائددر . فقط ملت کندی امور عامه سنده بالذات کندیسی اجرا ایتمه یوب او اجرا آتی انتخاب و بیعت طریقله خلیفه نه تفویض ایتمش . ایشته بو صورتله خلیفه ولایت عامه یی ابن همامك تعیری وجهله تصرف عامه استحقاقی احراز ایله مشدر . آندن دو لاییدر كه افراد امت اوزرنده حق تصرفه مالك اولمشدر وینه بوندن دو لاییدر كه خلیفه ، ملتك و کیلی اولمشدر .

صوكره بوراده بر قاعده ده اوار . اوده قاعده و كالتدن خقیبور . اوده شودر . وكالت بعضاً مطلق اولور ، بعضاً مقید اولور . چونكه بر کیمسه دیگرینی وکیل ایدم چکی زمان دیلر سه مطلق صورتده وکیل ایدر ایسته دیکنی یاپ دیر ، بوکاوکالت مطلقه دنیبر . دیلر سه وکیلک یاپه جنی ایشلری تعیین ایدر . بعض قیود و شروطه تابع قیلار . بوکاده وكالت مقیده دینور . بو صورتله وکالتمه اطلاق و تقیید مؤکاك حقیدر . اوکا کیمسه برشی دیه منز چونكه او ، کندی حائز اولدینی ولایتی وکیلنه ویریور . فصل ایسترسه اوله ویرر . بو اونك حقیدر .

شو حالده بو قاعده خلافتده ده جاریدر . ملت دیلر سه ، خلیفه یی صورت مطلقه ده انتخاب ایدر . اونك هیچ بر تصرفی تقیید ایتمز . بو صورتده بو حکومت مطلقه دیمکدر . دیلر سه ملت خلیفه نك تصرفاتی بعض قیود و شروطه تابع طوتار . بو صورتده ده حکومت مقیده اولور . ایشته

گنبدنده موجود اولان صفت ابوت ، اولادی حقننده کی تام و حقیقی
شفقت سببیه او چو جغک لهنه تصرف حقنی بخش ایدیور . چو جق
طرفندن تفویض ایدلمکه متوقف دکلدر . دوعریدن دوعری به شریعت
اولایتی بابایه ویریور . چونکه اورته ده بر چو جق وار . باقلمق و تریه
ایدلمک ایستر . وراثت طریقله کندینه انتقال ایدن ماللرینی صیانت ایتمک
لازم . امشته شریعت بوکی شیلری بابایه ویرمشد . بابادن ماعداهیه چ بر
کیمسه نك او چو جق اوزرنده امر ونهی نافذ اولماز . ولو که ایکی یا شنده چو جق
اولسون کیمسه نك اوکا شورایه کیت ، بوراده او طور کی امر ایتمکه حق
یوقدر . بو امر نه در ؟ جبراً سوز کچیرمک دیمکدر . ولایتدر .
تفویض ایستر . تفویض اولما دجه کیمسه بو ولایتی حائز اوله ماز . فقط
بابا شفقت کامله به طبعاً مالک اولدیغندن شریعت بو ولایتی بابایه ویرمشد .
فقط بعضاً باباده براحتراضه مغلوب اوله رق چو جغک مالی و یا نفسی
سوء استعمال ایده بیلیر . بو کامیدان ویرمه مک ایچون شریعت بابانک
ولایتی ده چو جغک نفی شرطیله مشروط قیلمش ، اوقید ایله تقید
ایتمشدر . اونک ایچون بابانک ضرر محض اولان تصرفاتی چو جق حقننده
نافذ اولماز . باطل اولور .

ولایت تفویضه کلنجه : بو برذاته باشقه سنک بخش ایتدیکی ولایتدر .
اوکا تفویض ایدیور . وکیل ، وصی و متولینک ولایتی کی . والیرک ،
حاکمیرک ، قوماندانلرک و بویوک ملت مجلسنک ولایتلری هپ بو ولایت
تفویض نوعنددر . مجلس عالی حائز اولدینی ولایت عامه یی ملتدن
آلمشدر . اونک ایچوندره مدتی موقتدر . زیرا کندی ذاتنده موجود
و مندرج اولان بر ولایت دکلدر . ملت تفویض ایتمشدر و بر مدتله تقید
ایله مشدر . خلیفه مک ولایتی ده بویله در . اوده ولایت عامه یی ملتدن
آلمشدر . ملت بو ولایتی انتخاب و بیعتله اوکا تفویض ایله مشدر .

بر قاعده حقوقیه عرض ایدیم . جمله کز بیایر سکیز ، بر انسان کرک
 کندی نفسنده و کرک کندی مالنده کیف مایشاء دیله دیکی کبی تصرف
 ایدر . دیلر سه بو حق تصرفی بشقه سنده بخش ایدر . نته کم بشقه سنه
 ویردیکی زما او ذته وکیل دینر و او ذات سزدن آلدینی حق تصرفه بناء
 سزک مالیکزه تصرف ایدر . اونک بیع و شرایی آرتق ناهذا ولور و سز او نی
 قبوله مجبور اولور سکیز . چونکه اونک یامش اولدینی او تصرف وؤکلی اولان
 ذات طرفندن بخش ایدمش بر ولایتدر . وؤکل ، کندی نفسنده ، کندی مالنده کی
 ولایتی اوکا ویرمشدیر . بوجهتله او ، بو ویریلن ولایت به بناء اجرای
 تصرف ایدیور . بر فرد بویه اولدوغی کبی بش ، اون ، یوز ، بیک
 و دها ریاده افراددن مرکب بر شرکت ، بر جماعتده بونی یاپایلیر .
 بویوک ، کوچوک علی العموم شرکتلر ، جماعتلرده عین وضعیتده در .
 دیلر سه اونلر امور مشترکه لرینی دوغری بدن دوغری ویه کندیلری کور ودرلر .
 دیلر لر سه کندی ایچلرندن ویا خارجدن بر ویا متعدد اشخاصی مدیر
 یعنی وکیل تعیین ایدرلر . یعنی کندیلرینک امور مشترکه لرنده حائز
 اولدقلری کندی ولایتلرینی او متعدد افراددن مرکب بر هیئته ویا
 بر شخصه بخش ایدرلر . حکم مسئله سی ده بویه در . حکم ده مثلاً
 سزدن ولایت آلامدجه سزک علمکزه ویا اهلکزه حکم ایده مز .
 نه وقت سز برینی کندیکزه حکم انتخاب ایدر سه کز او وقت اونک حکمی
 سزک اوزر کزده نافذ اولور . نه دن نافذ اولور ؟ چونکه سز او
 ولایتی اوکا ویرمسه سکیز ، بوندن طو لای نافذ اولیور . ایشه بو
 و امثالک جمله می هپ ولایت بخشدیر .

دیگر بر اعتبار ایله ده ولایت ، ولایت ذاتیه و ولایت تفویض ناملریله ایکی یه
 آیریلور ولایت ذاتیه بر دانه در اوده بابانک ولایتدر . شریعت بابایه

موافقت ایتسون، ایسترا ایتسه سون . بشقه سی اوزرینه سوز کچیرمک
 دیمکدرکه جبراً سوز کچیرمک دیمک اولور . بویله جبراً سوز کچیرمک
 غیر مشروع اولورسه اوکا ظلم و تحکم دینیر . مشروع اولورسه ولایت
 اطلاق اولنور . بر قانونه مستند اولورسه اوکا حکم دینیر . الفظ
 بشقه بشقه در . فقط معنا هپ بر در . اعتبارلر ، جهتلر آیریدر .
 بناء علیه بو ولایت اول امرده ایکی قسمه آریلیر . ولایت عامه ، ولایت خاصه .
 ولایت عامه دیمک حکومت دیمک ، حاکمیت دیمک ، سلطنت دیمک ،
 شو مجلس عالینک تصرفی دیمکدر . ولایت عامه نك معناسی بودر . مملکتک
 هر طرفه و بوتون افراد و بالجمله امور عامیه شاملدر . بوکون تورکیده بو
 مجلس عالینک قرارلری اولمادجه هیچ بر کیمسه نك دیکر بر کیمسه
 اوزرنده جبراً سوز کچیرمک حق یوقدر ، کچیره من ، کچیریرسه
 غیر مشروع ، غیر قانونی اولور ، مستلزم مجازات بر حرم تشکیل ایدر .
 نه وقت سز بر قرار ویرر و بر قانون یاپارسه کز او وقت اوندن اول
 ظلم اولان شی شمدی بو قراردن صوکره ، بو قانوندن صوکره
 مشروع اولور ، عدالت اولور . چونکه بونلر امور اضافیه دندر .
 عدالت ده ، ظلم ده امور اضافیه دندر ، نسیدر . ذاتاً دنیاده مطاق
 بر شی یوقدر ، هر شی نسیدر . اونک ایچون بر زمانده عدالت اولان
 دیکر بر زمانده ظلم اولور .

اوحالده خلیفه نك ، امامک ، حکومتک و یا خود سلطانتک امرلری ،
 تصرفلری نصل نافذ اولویور ؟ ایشته انتخاب و بیعت اونک ایچون
 شرطدر . خلیفه یی انتخاب ایتمک ، امام دنیان ذاتی انتخاب ایتمک ،
 حق مبعوثلری انتخاب ایتمک اونک ایچون شرطدر . یعنی بونلرک
 امرلری ، تصرفلری معتبر و مشروع اولاق ایچون شرطدر . سزه بسیط

و بیعتده مؤکل اولان ملت طرفدن درمیان ایدیلان قید و شرطه رعایت ایتمهکجه مجبوردر . ملت کندی ولایت عامه سنی یعنی امور عامه ده تصرف عام صلاحیتی خلیفه به مطلق صورتده بخش ایتمش ایسه خلیفه نیک بو نوع خلافت مطلقه سنی ، حکومت مطلقه دیمک اولور . خاقای راشدینک خلافتی کبی . بوقا اگر ملت اثنای بیعتده خلیفه نیک خلافتی یعنی ولایت عامه سنی بعض قیود و شروطه تابع طوتمشه اولوقت بو نوع خلافتده ، حکومت مشروطه دیمک اولور . عثمانلی مشروطیتنده اولدینی کبی . بونک هر ایکسی ده جائز اولدینی کبی ملنک کندی امور عامه سنده هیچ برکیمسه به حق تصرف بخش ایتمه . مسی ده اساس اعتبارله جائز اولق لازم کلیر . ملت کندی ایشی کندم کوره حکم ، آرتق سن رشده بالغ اولدم . کندی امور مشترکده کندم تصرف ایتمک ایچون لازم کلن اهلیت و معلوماتی ده حائزم . بناء علیه تصرف عام حقنی آرتق کیمسه به و برمه حکم دیه جک اولورسه اوکانه دینه بیلور ؟ ایشته شمدی بزده بوبله یایمق ایسته یورز . بوکافقه و حقوق اعتبارله هیچ برمانع یوقدر . یترکه ملت حقیقه رشید اولسون و بو خصوصده وجودی لازم کلن تربیه سیاسی و اجتماعی به مالک بولونسون . قرآن کریمده (مسلمانلرک ایشی کندی آرهلرنده مشورتله کورولور) دیدیکی ایچون بوکامساغ شرعی بولوندیغنی بیلدیری یور . زمانزده برچوق بویوک دولتلرده کمدیلرینی بو صورتله اداره ایدیور . بک کوزل اداره ایدیورلر . مقصوده حاصل اولوبور . اولجوده دیمشدم . خلافت دیمک حکومت دیمکدر . مقصود اولان ممالکیت و ملتی عادلانه بر صورتده حسن اداره ایتمکدر . یوقسه شکل حکومت دکدر .

بو بحثی بر آزدها ایضاح ایتمک لازم کلیرسه دیرکه ولایت ، ایستر

حق تصرف آلمی ضروریدر . بابانك چو جق حقنده کی ولایت ،
ولایت ذاتیه دنیایکمی سویله مشدک . بشقه بر ذتک دیگر بر شخصه
ولایت ویرمسنه و او شخصک بو صواتله حائر ولایت اولاسنده (ولایت
تفویض) اطلاق اولور . دیمک اولیور که ولایت ایکی قسمدر .
بری ولایت ذاتیه در که بابانك ولایتدر . دیگر ی ولایت تفویضدر که
عاقل و بالغ اولان بر شخصک دیگر بر ذاته ویرمش اولدینی ولایتدر .
ایشته وکیلک ، وصینک و متولینک و حکمرانک حائر اولدقلمی ولایتلر
هپ ولایت تفویض جمله سندنذر . ایشته خلیفه نك حائر اولدینی ولایت ده
بو ولایت تفویض نوعندندر . چونکه هیچ بر کیمسه نك کنیدیکنندن
ویا وراثت طریقله خلیفه اولمق حق یوقدر . ابن همام یوقاریده کی
تعریفندن آکلامشدر که خلیفه اولمق دیمک تصرف عامه مستحق اولمق
دیمکدر . بو استحقاق ایسه ملت طرفندن بر شخصه بو تصرف عام
صلاحیتی ویرلمکه حاصل اولور که وکالت دیمکدر . امور عامه دیان شی
ملتک کنندی امور مشترکه سیدر . بر مملکتک اداره سی دیمک او مملکتده
ملته عايد اولان ایشلرده تصرف ایتک دیمکدر . بویسه دوغروندن
دوغرویه ملتک کنندی ایشیدر ، ملتک کنندی حقیدر . ملت بو حقنی
بشقه سنه ویرمدکجه هیچ بر کیمسه او حقه مالک اولماز . ایشته بو اساسه
میپذیر که فقهای اسلام یعنی اسلام حقوقچیلری خلافت ملته خلیفه
آرده سنده منعقد وکالتدر دیرلر و بو خصوصده تماماً قاعده وکالت
احکامنی تطبیق ایدرلر . مثلاً وکالت مطلق اوله جنی کی مقیده اولایلیر
وکیل اولان ذات مؤکلفک حین توکیلده در میان ایتدیکی قیدر شرطه
رعایت ایتمکه مجبوردر . اوقیده رعایت ایتمزسه تصرفی معتبر اولماز .
بونک کی خلافت ده وکالت نوعندن اولدیغندن خلیفه اثنای انتخاب

باشقه هیچ بر کیمسه نك دیگر فرد اوز رنده بویه ولایت ذاتیه سی یوقدر .
هر کسك کندی نفسنده و اوالنده ولایتی ، تعیر دیگر له حق تصرفی
واردر . اونك بو ولایت و تصرفه کیمسه قاریشاماز . ایشه بو اساسه
بناء درکه (هر کیمسه کندی عالملك پادشاهیدر) دینیر . بر ذات دیگر
شخص حقنده ولایت و حق تصرفه مالک اوله بیلیمك ایچون ، مطلقا اوشخصدن
ولایت حقنی اخذ ایتمی لازم کلیر . مثلاً بر کیمسه دیگرینك بر مالی
بشقه سنه صاته بیلیمك ایچون مال صاحبندن مأذونیت آلمش اولمق لازمدر .
دها اولجه اویله بر مأذونیت آلامش ایسه اوصاتش معتبر اولماز . بو
خصوصده ، مأذونیت آلمق نه دیمکدر ؟ اومالی صاتمق ولایتی اونك رضاسیله
اوندن آلمق دیمکدر . ایشه او ولایتی آلمش اولان ذاته وکیل دینور .
اوکا اوولانی ویرن ذاته مؤکل دینور . وکیل بویه بر ولایت آلامش
ایسه اوکا وکیل دینمز ، فضولی دینور . فضولیمك تصرفاتی ایسه معتبر
اولماز . مکرکه مال صاحبی بالآخره اوکا موافقت ایتش اولسون .
بو صورتده اجارت لاحقه وکالت سابقه حکمنده در دینیر و او اعتبار ایله
فضولینك تصرفی معتبر اولور . حکم مسئله سی ده بویه در . یعنی بر کیمسه
دیگریله اولان دعواسنده بشقه بر ذاتی کندی رضاسیله حکم اتخاذ
ایتمه دیکه اوزنك او کیمسه علمنده وقوع بوله حق حکمی معتبر اولماز .
فضولی اولور . بر شخص کندی علمنده حکم ایتیمك حقنی بشقه بر ذات
ویرمیدر که اوزنك او کیمسه علمنده کی حکمی معتبر اولایلسون .
چونکه دمین نهدیمشك ؟ بابادن ماعدا هیچ بر کیمسه نك دیگر بر ذات
حقنده ولایتی ، حق تصرفی بو قدر دیمه مشمی ایدك ؟ ایشه بونك
ایچون هر کیم اولور سه اولسون دیگر بر ذنك اهنده و یا خود علمنده
تصرف ایده بیلیمسی ایچون اوزاتدن کندی رضاسیله اخذ ولایت ایتمه سی

کبی تصرف ایدر . غیره ضرر ویرمدکجه هیچ بر کیمسه نك مداخله
ایتمک حقی یوقدر . هرکس حقوقه مساویدر . اویله صنف امتیازلری ،
زادکانلق اصولی کبی شیلر یوقدر . اسلامیت تام معناسیله ده موقراتیک
بر دیندر وهیچ بر کیمسه نك امتیازی قبول ایتمز . قرآن کریم (ان
ا کر مکم عندالله اتقاکم) بویوریور . یعنی (الله عندنده سزک اک مکرم
اولانکز الله دن اک چوق قورقانکزدر) دیور . ایشته بونک ایچوندرکه
بویوک ، کوجوک شریف ووضیع هرکس نظر آهیدمه مساویدر . للهک
عندنده اک مقبول و مکرم اولان ذات ، کیمک اوغلی اولورسه اولسون
الله دن اک چوق قورقان زاندر . بونک ایچوندرکه اسلامیتده هیچ بر
کیمسه کندی شخصی امتیازندن متولد اولمق اوزره دیکر بر فرد
اوزرنده جبراً سوز کچیرمک ، اوکا امر ونهی ایتمک حقی حازدکلدر .
اسلامیتده یالکز بر ذاتک دیکری اوزرنده ولایتی ، جبراً سوز
کچیرمک حقی وارددر که اوده بابادر . ایشته یالکز بابانک اولادی
اوزرنده سوز کچیرمک حقی وارددر که ، ولایتدر . باباچوجغک و لیسیدر .
بوولایت بابانک بابالق وصفندن متولددر وچوجق حقنده شفقت
کامله یه مالک اولدیغنددر . اورتده بر چوجق وار . بابلمق ایستر .
کندیسنه ارنأ انتقال ایدن اموالی صیانت ایدمک لازم . چوجقدر ، کندیسنه
باقاماز و اموالی صیانت ایده مز . بوکا کیم باقاجق ؟ و اموالی کیم صیانت
ایده جک ؟ شریعت اسلامیه چوجغه باقق ، تعبیر دیکرله چوجق اوزرنده
ولایت حقی حاز اولمق خصوصی ، چوجق حقنده اک یاده شفقت مالک اولار ،
هرکسدن زیاده اونک نفع و خیرینی دوشونه جک اولان ذاته ویریور که
اوده بابادر . ایشته بابانک بوولایتیه ولایت ذاتیه دینور . بابانک ذاتندز ، بوت
وصفندن نشأت ایدن بر ولایتدر . بابادن باشقه و بابا حکمنده اولار بویوک بابا دن

شرعاً آجاز میدرد؟ اوت بر کیمسه نك دیگرینه جبراً سوز کچیر مکّه قالقشما سی غیر مشروع اولورسه اوکا تحکم دینور ، تغلب دینور ونهایت سلطنت دینور . فقط مشروع اولورسه ایشته اولوقت اوکالایت دینور . شمدی بو مسئله نی بر مقدمه ایله ایضاح ایدیم .

محترم افندیلر ! حقوق اساسیه جه اوچ حق وارد رک بو اوچ حق هر فرد مساوات تامه اوزره مالکدر و اوچ ده لایتغیردر ولایتز . لزل حقدر . برنجیسی حق حریت ، ایکنجیسی حق عصمتدر که بز شمدی بوکا مصونیت شخصیه اطلاق ایدیورز . نفسك وعرضك معصونیت ومصونیتی دیمکدر . اوچنجیسی ده حق ملکیتدر . ایشته بو اوچ حق اسلامیتک حقوق اساسیه سندندر . دیگر بوتون حقوق بو اوچ حقدن تولد ایدر . بو اوچ حق بوتون حقوقک آناسی ومنشأیدر . زمانزده متمدن مملکتلرک حقوق اساسیه سی ده بو اوچ حق دکلیدر؟ اوت ، اویله در اما بز بو حقوق اساسیه نی بوکون دکل ، ۱۳۰۰ سنه اول او کرئمشر . لیکن مع التأسف خلافت نامی آلتنده صو کره کان مستبد حکومتلر بو حقوق اساسیه حقیله رعایت ایتمه مشلدر .

اسلامیتده هیچ بر فردک دیگر بر فرد اوزرنده کندیلکیندن بذاته حق ولایتی یوقدر . هیچ بر کیمسه دیگرینه جبراً سوز کچیر مک حقنی جائز دکلدر . هیچ بر فرد دیگرینه اویله جبراً شونی یاپ ، بونی یاپمه ، شوراده اوطور ، اورایه کیتمه دیبه من . هر کس حر در ؛ ایسته دیکی یرده اوطورور ، قالقار ، ایسته دیکی کبی حرکت ایدر . باشقه سنه ضرر ابراث ایتمه یکه کیمسه اوکا قاریشاماز . کذلک هر کسک نفسی ، عرضی محترم و تعرضدن مصوندر . حق تملک ده بویله در . هر کسک مالی ، ملکک تعرضدن مصوندر . هر کس ، کندی مال و ملکنده دیله دیکی

یعنی امامت ، تعبیر دیگر له خلافت مسلمانلر اوزرینه تصرف عامه استحقاقدر دینور . ایسته خلافتك فقه یعنی علم حقوق نقطه نظرندن تعریفی بودر . علم اعتقاد کتابلرنده خلافت دها دوعروسی امامت بشقه صورتله تعریف اولنور . (امور دینیه و دنیویه حضرت پیغمبردن خلف اوله رق مسلمانلر اوزرنده ریاستدر) دینه تعریف اولنور . ابن همام بویوك فقیه اولدیغندن (امامت) ی فقه و حقوق نقطه نظرندن تعریف ایتك ایسته مش ، آنك ایچون امامت مسلمانلر اوزرینه تصرف عامه استحقاقدر دیمشدر . ایسته اقدیلر ، امامتك ، تعبیر دیگر له خلافتك اك كوزل واك دوعرو تعریفی بودر . تصرف عامه استحقاقدر دبیرور . تصرف عام دیمك بوتون مسلمانلره شامل اولمق اوزره آنلرك امور عامه و مشترکه سنده تصرف دیمكدر . بوا لسان فقهده یعنی حقوق اسلامیة اصطلاحاتنده (ولایت عامه) دینور . ولایت نه دیمكدر ؟ و تصرف عامه استحقاق نه صورتله حاصل اولور ؟ علی العموم مسلمانلر اوزرنده تصرف عامه مستحق بر کیمسسه وارمیدر ؟ بونلری ایضاح ایتك لازم کلیرور . رجا ایدرم مسئله درینله شبور . غایت علمی بر صفحه یه کیریور دقتله دیکله مکمز لازم کلیر .

(ولایت) ی علمای اسلام (تنفیذ القول علی الغیر شاء او ابی) دینه تعریف ایدر لر . معناسی ایستر موافقت ایتسون ، ایستر ایتمه سون بشقه سی اوزرینه سوز کچیرمك دیمكدر . ایسته ولایتك معناسی بودر . شو حالده شریعت اسلامییه نظراً بویله ایستر موافقت ایتسون ، ایستر ایتمه سون بشقه سی اوزرینه سوز کچیرمك حققی حائز کیمسسه وارمیدر ؟ بو جبراً سوز کچیرمك دیمكدر که تحکمدن بشقه برشی دکلدر . تحکیم

دکدر. ملت مؤکل، خلیفه اونک وکیلدر. خلیفه انتخاب و آکا بیعت ایتک
 دیمک عقد وکالتی ایجاب ایتک دیمکدر. بیلیرسکیز که هر عقد، هر مقاوله
 طرفینک ایجاب و قبولیله منعقد اولور. ایشته خلافت ده بر عقد و بر
 مقاوله در. همده بوتون فقهایک بالافاق بیاناتی وجهله عقد وکالت
 نوعنددر. حقنده قاعده وکالت احکامی جاری اولور. چونکه افندیله،
 دفعات ایله عرض ایتشدم که خلافت ماهیت شرعی سی اعتباریله حکومت
 دیمکدر، بیلیرسکیز که حضرت پیغمبر، بر طرفدن احکام شرعی یی وضع
 ایدر، تشریع ایدر، دیگر طرفدن ده بالذات او احکامی اجرا ایدردی.
 اطرافه والیلر، قاضیلر، قوماندانلر نصب و تعیین ایلردی و محاربه لرده
 بالذات باش قوماندانلق وظیفه سنی ایفا ایدردی. حتی پک کوزل بیلیرسکیز،
 (احد) غزاسنده یناغندن یارالانمشدی. بو احوال ایسه سویله مکه حاجت
 یوق اجرای حکومت دیمکدر. آنک ایچوندر که خلافت ده حکومت
 دیمکدر. فقط کړک عصر سعادتده و کړک صوکره لری حکومت تعمیری
 مصطلح اولمامشدی. حکومت کله سی اغتده حاکم اولوق، امر و منع ایتک،
 تحکم ایتک دیمکدر. شرعاً پک مقبول بر شی دکدر. اونک ایچون
 اولوقتلر حکومت تعمیری قوللانیلماش، اونک یرینه خلافت تعمیری
 استعمال ایدلمشدر. فقهای حنفیه نك متأخرینی میاننده ابن همام نامنده
 بر ذات وارد که مجتهد درجه سنده بویوک بر فقیهدر. سیواسده دو غوب
 اسکندر یه ده یتیشمشدر و اوراده نشر علوم ایدرک غایت فیاض اثرلر
 وجوده کتیرمشدر. دو قوزنجی عصر هجری رجالنددر. بونک علم
 کلامه یعنی اعتقادیانه دأثر (مسایره) نامنده بر کتانی وارد که مطبوعدر.
 بوندن اولده بر قاج کره اسمنی ذکر ایتدم. ایشته او کتایده امامت
 (هی استحقاق تصرف عام علی المسلمین) دییه تعریف اولونیور.

الحاصل مسلمانلرک بربرینه معاونت ایتملری بر لازمه دینه در .
 بوتساند دینی واجتماعی قضیه سیدر . مسلمانلر اجزاسی بربرینه کندلش
 بنا کیدر . یکدیگری طوتارلر، بربرلندن آیرمازلر مالانده بر حدیث
 شریف واردر که اهل اسلام آره سنده کی تساندک درجه لزومنی کوسترد .
 بوبابده دهاپک چوق حدیث شریفلر واردر . هربری بردستور اخلاقی وپک
 یوکسک وجیزه اجتماعیه در . اونک ایچون هندک، مصرک، افغانک، تورکستانک
 ودیگر عالم اسلامک بزه و بزم اونلره ارتباطمز هپ بوتساند دینیدن
 متولددر . اوزوالایلرده کندیلرینی اسارتدن قورتارمق ایچون برمددکاه،
 بر ال آرایورلر . (براوو سسلری) ایشته بونک ایچون در که بزخلافی
 الغا ایتسه کده ، ایتسه سکه ده اونلر دأما اللرنندن کلدیکی قدر بزه معاونتده
 دوام ایده جکلردر وایتملری لازمدر .

* *

علی شعوری بک (قره سی) — اولجه نشر ایتش اولدیغکیز
 رساله کزده خلافتی وکالتله تعریف ایدیوردیکیز . خلافت بر نوع
 وکالتدر . خلیفه ملت اسلامیه نک وکیلیدر دیوردیکیز . بونقطة نظر کزدن
 فراغتمی ایتدیکیز ؟

عدلیه وکیل سید بک (ازمیر) دوامله — خاییر ! اونقطة نظر مدن
 فراغت ایتهدم . فقط بنده کز بک اوزون کیده جک دییه بومسئله حقننده
 بوتون بیلدکلرمی سویلک ایسته میورم . (سویله، سویله دیگله رز سسلری)
 مادام که ایستیورسکیز او حالده بنده سویلیهیم . فقط صبریکیزی سوء
 استعمال ایدیورم؛ سوزلرم بر آزدها اوزایه جقسده مسئله نک پک بویوک
 اهمیتی اولدیغندن عفو کزی تمی ایدرم . (سویله لذتله دیکلور ز سسلری)
 سید بک (دوامله) — اوت علی شعوری بک افندی؛ خلافت بر نوع
 وکالتدر . ملتله خلیفه آره سنده عقد ایدلش اولان وکالتدن بشقه برشی

هیولا کی بر مقامده اوطور مسندن طولای دکدر . اسلامیتده انسانلر
حقنده قدسیت یوقدر . اسلامیتده او یله خرسیتانلقده اولدینی کی
روحانیت یعنی حکومت روحانیه یوقدر . کذلک اسلامیتده نه تشکیلات
دینی، نه تشکیلات اداریه یوقدر . شریعت اسلامی، تشکیلات دینی
تأسیس ایتدی کی تشکیلات اداریه پی ده امت اسلامییه ترک ایتمشدر .
اسلامیت ، مقدس اوله رق یالکیز بر شیئی طانیر که اوده (حق) در .
مقدس اولان یالکیز حقو قدر، (حق) در . جناب حقک اسمی ده
(حق) در . قدسیت ده اونده در . بعض دینلرک بعض اشیایه ویردی کی
قدسیقی اسلامیت ویرمه مشدر . هله انسانلر هیمچ قدسیت ویرمه مشدر .
ذره قدر ویرمه مشدر . پیغمبرلر بیله قدسیت ویرمه مشدر . حضرت
پیغمبرک اک بویوک دعاسی (اللهم ارنا الاشیاء کما هی) دعاسی ایدی .
معناسی (یارب بزہ حقایق اشیائی اولدینی کی کوستر) دیمکدر .
دیگر بر دعاسی ده (اللهم لاتجعل قبری وثناً یعبد) دعاسی ایدی .
معناسی « یارب بنم قبری طاییلر پوت یاپمه » دیمکدر .

طونلی حامی بک (زونفولداق) — یاشا خواجهم یاشا !
عدلیه وکیلی سید بک (از میر) دوامله — شمدی سزه صورارم،
بویله بر دین عالی بر طاقم اشخاصی خلیفه در دیه باشکزه اوطور تمق
واوکا طاپارجه سنه بر طاقم قدسیت ویرمک قبول ایدرمی ؟ بوکا امکان
یوقدر . اسلامیت بوندن مزهدر ، متعالیدر . بو بر طاقم اغفالاندن ،
دور استبدادده سلطنتلرک یامش اولدقلمی مظامی ستر ایچون مستبد
حکمدارلرک اطرافنده بولنان ریاکار اشخاصک قصداً وقوع بولان
تلقیناتندن ویر طاقم جاهل وساده دل ذواتک یا کلش تلقیاتندن نشأت
ایتمش وکیدرک عمومی بر فکر حاله کلش بر خرافه در .

ابتدای . ظن اولونیور که بز خلافتی لغو ایدرسهک مصرده ، هندستانده
 ودیکر اسلام مملکتلرنده پک فما تأثیر یابه حق . بو بنجه پک بوش بر
 فیکردر . امین اولک افندیلر ، بونک عالم اسلامده هیچ بر تأثیری
 اولاماز . اولجوده سوبله دیکم کی عالم اسلامک علماسی کیمک خلیفه
 اولاجغنی و فصل خلیفه اولوق لازم کله جگنی بزدن ایی بیلیرلر . عالم اسلامک
 بزه اولان معاوتی بیلیمورم ، حقیقه وارمیدر ؟ افندیلر ! بش اون لیرا
 ویرمکله اوکامعاونت دینمز . وقتیه استانبولده جهادفتواسی اصدار اولوندینی
 زمان عالم اسلامدن هیچ بر صدای اجابت صادر اولمادی . عراقی ، سوریانی
 وحتى کویا مقر خلافت عد اولونان استانبولی اشغال ایدن اردولر هندستانک
 مسلمان عسکرلرندن مرکب ایدی . بنی عربیان خاندنه بر او طهیه قاپایه رق
 باشمده نوبت بکله بن مسلمان هند عسکری ایدی . رفیقهم و چو جقلم
 زیارتمه کلدیکی زمان اونلرله بنم آرمه کیره رک النده خنچرله نوبت
 بکله بن مسلمان هند عسکری ایدی . ایچمزده شیخ الاسلاملق ایتمش اولان
 ذاتده برار مالطهده اسیر یاشادیغمز زمان عالم اسلامک هیچ بر طرفندن
 بزه دست معاونت اوز تکلماشدی . افندیلر ! کنیدی می آلداتیمه لم ،
 حقیقتی اولدینی کی کورهم و کورمه ینلرده کوستره لم . اوت ، عالم اسلامک
 بزه و بزم اونلره معاونت ایتمه من لازمدر ، حتی واجبدر . بوتون افراد
 اسلامیة نکهده یکدیگر بنه الدن کلاسیکی قدر معاونت ایتمه سی واجبدر .
 فقط بو خلافت مسئله سی دکل ، خلافتدن دولای دکل ، اخوت دینی
 مسئله سیدر . مسلمانلر بر برینک قرده شی اولدیغندندر . قرآن کریم
 (اَیُّهَا الْمُؤْمِنُونَ اخْوَةٌ) بووریور . یعنی مؤمنلر بر برینک قرده شیدر
 دیور . ایشته عالم اسلام اوزرینه بزه معاونت ایتک بو اخوت
 دینی دن دولای واجبدر . یوقسه بر ذاتک خلیفه ناسیله

ممکن اولدینی قدر تأسیس ایتمک ایستدیکمز اصول اداره، مشورتدر، حکومتی مشورت اساسی اوزرینه تأسیس ایتمک ایستیورز و حتی ایتدکده . بواصول اداره تحسین الهی به مظهر اولدینی خالده داها نه ایسته یورز، باشمزدده هیولا کی بر خلیفه بولوندیرمه نك نه معناسی واردر ؟

ایشته افندیلر ، خلافت مسئله سنك علم کلام یعنی اعتقادات نقطه نظرندن ماهیت شرعیه سی بودر . بونی بو صورتله بیلیمک ، خالق تنویر ایتمک ، حقیقتی بیلدیرمک لازمدر و بویله بر زمانده بو بزم ایچون بر فریضه در . (آلفیشلر) حقیقه بعض ذتلر وار . مثلاً بزم محترم کوشخانه مبعوثی ذکی بك، محترم قسطنطونی مبعوثی خالد بك افندی حضر تلی کی . داخلده و خار جده دها بر چوق ذوات بولنه بیلیرکه بومسئله ده تردد لری واردر . اندیشه لر نده صمیمیت اولدیغنده هیچ شهیم یوقدر . کندیلرینی تقدیر و تجیل ایدرم . سوزلرنده بشقه بر غابه ، بشقه بر مقصد یوقدر . اندیشه لری بك طبعی بر اندیشه در . چونکه مسئله بك بویو کدر . عظیم بر انقلاب کچیریورز . کندیلرینی معذور کورورم . هیچ شبهه ایتمکه مسئله یی اولدینی کی بیلدکری زمان او اندیشه لری زائل اولور . اولرده کمال اعتدال ایله بزم نقطه نظریمزه اشتراك ایدرلر .

محترم خالد بك افندی « بن مسئله نك جهت شرعیه سنه قاریشام . جهت سیاسیه سنی دوشونیورم » دیدیلر . یعنی مسئله نك جهت سیاسیه سنندن اندیشه ایتدکری سویله دیلر . بوبابده در . ایکی سوز سوبله مک ایستهرم . کیمسه نك قناعتی سوء استعمال ایتمک ایسته مم . سوبلیه جکم سوزلر صرف بزم شخصی قناعتمدر . بونی یعنی خلافت مسئله سنك جهت سیاسیه سنی بنده چوق دوشوندیم . کچن سنه دنبری بعض مطبوعاتده بوندن بحث

مدینه منوره سو قافلرندہ تابصباح بکجی کبی دولاشیر . بالذات شهرک
آسایشی محافظہ چالیشیدی . حتی قابلی اولوب اولماق قلیخی آکلامق
ایچون قابولری یوقلاردی و « فرات نهرندہ بر اوغلاق بوغوله حق
اولورسه قورقارم کہ یارین جناب حق بی آندن مسئول طوتار »
دیہرک اغلاردی . مسئولیت حسی و آلله قورقوسی قلمبندہ او قدریر
ایتمشدی کہ آرمصرہ « یاربی ، مالک اسلامیہ پک زیادہ کسب وسعت
ایتدی . هر طرفدہ عدالت الہیہ کی نشر و توزیع ایتک بنم ایچون متعذر
اولدی ، آرتق بوبار مسئولیتہ تحمل ایدہ میہ حکم ، روحی قبضایت » دیہ
دعا ایدردی . ارتحائندہ مدیوناً وفات ایتدیکی ایچون اموالی صاتیوب
بورجلری تسویہ اولنمشدی .

حضرت امام علی دہ کیجہلری بری بیت المالک ، دیکری کندیسنک
پارہ سیلہ آلمان ایکی موم بولوندریرمش . مصالح ملتله مشغول اولورایکن
بیت المالک مومنی قوللانیردی . فقط اوصصرہ دہ کندی شخصی ایشیلہ
اشتغال ایدہ جک و یاخود نزدیک بری کلوب خصوصی مکالمہ باشلاہ حق
اولورسه در حال اومومی سوندوریر ، کندی پارہ سیلہ آلمان مومی
یاقاردی . حضرت عثمان ایسہ ثروت ذاتیہ مالک اولدینی ایچون
مصارف خلافت نامیلہ بیت المالدن هیچ برشی آلامزدی .

ایشتہ حقیقی خلافت بویله اولور . خلیفہ دیہ دہ بویله ذاتلرہ دینور .
زمانہ زده بویله خلیفہ بولمق ممکنیدر ؟ ممکن اولما نیجہ خلیفہ آرامانک
معناسی قالیرمی ؟ سوزلر مک مقدمہ سنده دہ سویله مشدم کہ شرع شریف
نظرندہ خلافتدن مقصد حکومتدر . بر حکومت عادلہ تأسیس ایتمکدر .
قرآن کریم دہ امر حکومتدہ اصول اداره اولمق اوزرہ بزہ مشورتی
توصیہ ایدیور ، (وامرهم شوری بینهم) دیپور . بزم دہ بوکون

اطاعت ایدیکز . شاید بن الله ورسوله اطاعت ایتز سه م مزده بکا
اطاعت ایتمه ییک! قالفکز نمازه رحمکم لا .]

حضرت ابوبکرک ارتحالنده هیچ بر نقد موجودی چیقما شدی .
بیت المالدن تقدیر اولنان نفقه ایله اورته حالد یاشاردی . اموال امیر-
یهدن نزدنده بر کوله ایله بر دوه و برده قفتان واردی . حال احتضارنده
کریمه سی ام المؤمنین حضرت عایشه بی چاغیرارق « بز خلیفه اولالیدنبری
ملک درهم و دینارنی بیه دک (یعنی پاره سنی بیه دک) قابا و بایاغی طعاملرینی
بی دک و قاتی البسه سی کیدک . (یعنی تقدیر اولنان نفقه) بو کوله ایله بودوه
و قفتان بم مالم دکل ، بیت المال مسلمینکدر . بن مصالح مسلمین ایله مشغول
اولورکن اونلری قولالایردم . سزه موروث اولماز و قائمه اوچنی ده
عمره کوندر ، دییه وصیت ایتشدر .

حضرت عایشه بر موجب وصیت اونلری حضرت عمره کوندرنجه
حضرت عمر « یا ابوبکر ، کندکدن صو کره کلنلری زحمته صوقدک ،
مشکل بر موقعه قویدک » دییه رک آغلادی و « آک بونلری بیت الماله
تسلیم ایدک » دیدی . بونک اوزرینه حاضر بالمجلس اولان عبدالرحمن بن عوف
« سبحان الله ، بر کوله و بردوه ایله بش درهمک کهنه قفتانک نه دکری
اولابیلیر ؟ امر ایتسه کزده اونلری حضرت عایشه اعاده ایتسه لر »
دینجه حضرت عمر « او عمرک زماننده اوله ماز . » جوابی ویرمشدر .
حضرت عمرده ایام خلافتنده ، حضرت ابوبکر کبی بیت المالدن
تقدیر اولنان یومی نفقه ایله کچینردی واقوات یومیه سنی پک دارطوتمش
اولدیغدن طاله سی مضایقه چکردی . دیگر اصحاب استحقاقه ایسه کندی
استحقاقندن فضله ویرردی برکون خطبه او قومق ایچون منبره چیقیدیغنده
اوزرنده کی البسه نک اون ایی یرنده یاما کورولمشدی . کچه لر

ایسته شو ایضا حاتم دن خلافت حقیقه ایله خلافت صوریه نك نه دن عبارت اولدینی تمامیه آکلاشلمشدر صانیرم . خلافت حقیقه اصل خلافتدرکه خلفای راشدینه مخصوص ومنحصر ایدی . کلدی کچدی . خلافت صوریه ایسه خلفای راشدیندن صوکره کلن خلیفه لرك خلافتیدرکه سلطنت قاهره دن باشقه بر شی دکلدر و شرعاً غایت مذمومدر . خلافت حقیقه ده خلیفه ، رسول اکرم افندیك ائینه ائقواء ایله پیغمبرانه بر حیات اداره و پدرانہ بر سیاست تعقیب ایده جك ، النده حضرت قرآن مشعل هدایت ورهبر حرکتی اوله جق ، قلبنده الله قورقوسی آنی هر حال و کارنده عدالتدن آیرمیه جق ، منصب و مأموریتلری برر امانت الهیه عد ایده رك اهانی بولوب آکا تقویض ایده جك ، حقوق مسلمینك ضیاعنه و اموال بیت المالک ذره قدر اسرافنه میدان ویرمیه جك ، اسلامیتك انیکشاف و تعالیسی و اهل اسلامك سعادت و ترقیسی نهیه متوقف ایسه آنی استحصاله بذل مقدرت ایلیه جك . شمدی زمانم زده بویله بر خلافت حقیقه تأسیسی قابلمیدر ؟

حضرت ابوبکر صدیق ، مقام خلافته انتخاب اولدینی زمان منیره چیقوب جناب حقّه حمدو ثنا ایتدکن صوکره شو خطبه یی ایراد ایتمش ایدی . [ای ناس بن سرك اوزریکزه ولی الامر اولدم . حالبوکه بن سرك اك خیرلیکنز دکلم . اگر ایيلك ایدرسهم بکاظهیر اولوکنز . اگر فبالق ایدرسهم بنی دوغرو بوله سوق ایدیکنز . دوغرولق امانتدر ، یالانچیلق خیانتدر . سرك ضعیفکنز عندمده قوی دیمکدر که حقنی ظالمدن آلیویریرم . قویکنزده عندمده ضعیفدرکه آندن مغدورك حقنی استحصال ایدرم . هیچ ریکز جهادی ترك ایتمه سون ، جهادی ترك ایدن قوم ذلیل اولور . بن الله ورسولنه اطاعت ایتدکجه سزده بکا

بچنده بوسؤال كندى طرفدن ايراد اولوندقدن صوكره اوكا جواباً
 دمين ديديكيم كې (شرائط امامتى جامع برذات بولونماديني صورتده
 اهل اسلام اوزرينه امام نصب ايتك واجب اولماز) ديه مذكوردر.
 سوزمك صحته اينانمق ايسته مەينلر بوكتابه مراجعت ايتسونلر.
 فقط بوسورتده مملكت آنارشى، ملت اختلال ايچنده قالمازمى؟ نهوت،
 ملت فوضوى برصورتده باشى يوش كندى حالته ترك ايديلير، حكومت
 تأسيس ايدلمزسه شبهه سز مملكت آنارشى وملت اختلال ايچنده قالير.
 لكن صاحب موافقك مقصدى بودكلدر. شرائطى جامع، حقيقى خليفه
 معناسنه برامام نصبي ممكن اولماديني صورتده آرتق اومعناجه امام نصبك
 وجوبى ساقط اولور ديمك ايسته يور. بوندن حكومت تأسيسنه ده لزوم
 يوقدر معناسى چيقماز. مقصدى (شرائط خلافتى جامع برامام نصبي
 متعذر اولديني صورتده ينه حكومت تأسيسى واجب اولور. فقط آرتق
 اوكا خلافت ورئيس حكومته ده خليفه معناسنه امام دينز و بوندن
 دولايى ملت اسلاميه كناهكار اولماز) ديمكدر. نته كم بوندن
 اول اسمى چكن صدر الشريعه (تعديل العلوم) نده شرائط خلافتى
 تعداد ايتدكن صوكره شرائطى جامع خلافتك- حديث شريفده بيان
 اولندينى وجهله- اوتوز سنه ده تمام اولديغنى، اوندن صوكره رياست دنيويه
 وتغلييه دن عبارت اولان ملك وسلطنت تأسيس ايتديكنى بيان ايدىيور
 وصوكرده « شو ذكر اولنان شرائط خلافتدن ضرورتك اسقاط
 ايتديكى شرطلر ساقط اولمشدر كذلك زمانمزه قريشيك شرطى ده
 سقوط ايتمشدر » دىيور وبوسوزى سه ويله دكن صوكره (فكانوا
 ملعونين اينما ثقفوا اخذوا وقتلوا تفتيلا) آيت جليله سنى اقتباس ايدىيور
 وبو صورته شرائط خلافتى جامع اولمايان ملوك و سلاطينه شدتله
 هجوم ايدىيور .

تدریس اولنور . حتی بوکونه قدر استانبول مدرسه لرنده ، فاتح
مدرسه لرنده دخی تدریس ایديله کلمشدر . ایشته او کتابده ودیگر
بالمله کتب اسلامیه ده امامک قریشدن اولماسی مشروط اولدینی
وبشقه سنک امامتی جائز اولمایه جنی مطلق وقطعی بر لسانله بیان
ایدیلیور . (ولایحوز من غیرهم) دینور . اونک ایچوندرکه دمین
اسمنی ذکر ایتدیکم علامه تفتازانی شرح عقائدنده (خلفای عباسیه دن
صوکره حال مشکدر) دیور . شوخالده بو اشکالی رفع ایتک
ایچون نه یامق لازمدر ؟ نه دیملیدرکه بو اشکال مرتفع اولسون . بو خصوصده
سویله نه جک سوز شودر : شرائطی جامع بر ذات بولونمادینی صورتده
خلیفه نصب وانتخاب ایتک قضیه سی واجب اولماز .

شمدی بوراده غایت قوتلی براءتراض وارد اولور . دینه بیلیرکه
مسلمانلر اوزرینه برامام انتخاب ونصب ایتک واجبدر . بوبابده اجماع
امت واردر . بوتون علمای اسلام امام نصبک وجوبنده اتفاق
ایتملردر . بوکا نه جواب ویره جکسک ؟ بوسؤل حقیقه پک قوتلی بر
سئوالدر . ایشک ایچنه (اجماع) کیرنج . کندی طرفزدن نه سویله نسه
فائده ویرمز . هیچ کیمسه دیکله مز . چونکه اجماع اک قوتلی دلیل عد
اولنور و طرفزدن نه دینله جک اولسه بزه جواباً اجماعی عقد ایدن
علماء سندن دها ای بیلیر دینیایر . شوخالده بوکا فصل جواب ویرملیدر ؟
بونک جوابی شافعی علماسنک اک بیوک متخصصلرندن علامه عضدالدین
ویرمشد . بوذاتک (مواقف) نامنده غایت معتبر بر کتابی واردر . اهل
سنک اعتقادیاتنه دائردر . بیوک برکتادر . استانبولده مطبعه عامرده
اوج جلد اوزرینه طبع ایدلمشدر . بوتون علمای اسلامک النده حجت
کی طوتولور و مندرجانی سند اتخاذ اولونور . ایشته بو کتابک امامت

افندیلر ! کندی کندیمیزی آلداتیملم . عالم اسلامی بز هیچ
آلداته مایز . اونلرک ایچنده برچوق علما واردر . کافه سی بوکون
بزلردن عالمدرلر . کتب اسلامیة اللرنده در . اونلر خلافت اسلامیة نك
نه دیمک اولدیغنی بیلمزلمی ؟ هند علماسی ، مصر علماسی ، یمن
علماسی ، نجد علماسی ، کردستان علماسی خلیفه نك قریشدن
اولماسی لازم کله جکئی بیلمزلمی افندیلر ؟ بو صایدیغ یرلرک هیچ
بر عالمی بزم پادشاهلریمزک خلیفه لکئی دین نقطه نظرندن قبول ایتیر .
مصرده ، هندستانده ، کردستانده خلافتدن بحث ایدلایکی وقت بونک
جدی اولدیغنه اینانیور میسکز ؟ (براوو سسلری)

اونلرک علماسی هیچ بر زمان بزم پادشاهلره خلیفه دیمه مشدر .
کتابلری میدانده در . شافعیلرک اک معتبر کتابی اولان (منهاج نووی)
الده متداولدر ، مطبوعدر . بوتون شافعی مدرسه لرده ، بوتون
شافعی علماسنک اللرنده حرمتله ، احترامله تداول ایتکده در . او
باقیمکز ! شافعیلرجه بزم پادشاهلره خلیفه دینوب دینیه جکئی آکلار سکز
مالکی و حنبلی کتابلرینه ده باقیمکز اونلرکده بزم پادشاهلره
دیدکلرینی کورور سکز . حتی بزم عثمانلی علمامن بیله کندی
پادشاهلرینه خلیفه دیمه مشلدر . فقهایی حنفیه نك استادلرندن وتور کستانده
اک بویوک علماسندن امام نجم الدین عمر نسفی دنیلن بر ذات واردر
۵۳۷ تاریخنده سمر قنده وفات ایتمشدر . بویوک بویوک بر فقه
اولدینی ایچون کندیسنه (مفتی الثقلین) دنیلمشدر . بو ذاتک یا
چوق کتابلری واردر . مذهب حنفیده امامدر . بونک اعتقادیا
دائر (عقائد نسفیه) نامیله کوچوک بر کتابی واردر که سکز بو
سنه دنبری مذهب حنفینک جاری اولدینی بوتون شرق مدرسه لرنا

بیم‌کله قور توملشدی . فقط ضربك شدتندن قولی چیقمه‌شدی . شو
 حقایق تاریخیه میدانده واک موثوق و معتبر تفسیر و تاریخ کتابلرنده
 موجود ایکن علامه تفتازانیدك (ائمه دیندن اهل حل و عقد خلافت
 عباسیه نك صحتده اتفاق ایتشلردر) طرزنده اداره کلام ائمه سنك هیچ
 بر قیمت علمیه سی یوقدر . بونی بلا تردد و بی محابا سویلیه بیلیرم .
 واقعا امام ابو یوسف و امام محمد کبی ، شارالیه امام اعظم حضر-
 تلرینك طایفه سنندن اولان ائمه حنفیه ، عباسیلر زماننده قاضیلرک قبول
 ایتشلردی . حتی امام ابو یوسف بغدادده خلفای عباسیه دن مهدی ،
 هادی و هارون رشید زمانلرنده قاضی القضا تعلق وظیفه سنی ایفا ایتمشدی .
 فقط بو کیفیت اونلرک حقیقی خلافتنی تصدیقه دلالت ایتمز . چونکه
 بالجملة کتب حنفیه ده صراحت ذکر اولوندینی اوزره ائمه حنفیه نك اجتهاداتنه
 کوره ظالم و فاسق برپادشاهدن قاضیلق و والیک کی مأموریت قبول ایتمک
 ضرورته بناءً جائز و صحیح اولور . یالکیز بونده ظلمه و حق سزاغه
 آلت و واسطه اولماق شرطدر . ایشته بو فکر و اجتهاده مبذوره
 علمای اسلام ملوک و سلاطینک قاضیلرک برنی و سائر مأموریتلرینی
 برعهده ایتشلردر . خلاصه کرک خلفای امویه و کرک خلفای عباسیه
 حقیقتده خلیفه دکلدرلر ؛ سلطان و پادشاهدلرلر . آنلره خلیفه اطلاق
 اولونماسی بین الناس عرف اولماسندندر . تفسیر کشافده دمین ذکر
 اولونان آیتک تفسیرنده خلفای امویه و عباسیه حقنده (غاصب
 متغلبدرلر ؛ کندی کندیلرینه خلیفه اسمنی طاقینمشلردر) دیه
 تذکوردور . حتی دمین اسمی کچن (مسایره) نامنده کی کتابده
 صراحت ذکر اولوندینی اوزره مشایخ حنفیه نك بر قسمی اصحابدن
 معاویه بیله خلیفه دیمه یورلر ، ملک و سلطان دییورلر .

ایشان در. هم دولت امویه، هم در دولت عباسیه زمان لرزیده بر حیات
 بولانیور لردی. نه خلافت اموی، نه خلافت عباسیه بی تجویز
 و قبول ائمه مشدی. هنوز امویلرک حکمران اولدقلری ائنده حضرت امام
 حسینک اوغلی زین العابدینک مخدومی والیوم بمن قطعہ سنده بولنان
 (زیدیه) فرقه سنک امامی مشهور (امام زید) حضرت ترینه بیعت اولماسنه
 ال آلتدن فتوا ویرردی. آنک ایچون امویلر زماننده عراق والیسی
 وقوماندانی اولان مشهور (ابن هبیره) طرفندن ضرب وحبس
 ایدلمشدی. ابن هبیره هر کون مشارالیهی حبس خانهدن چیقارارق
 علی ملام الناس قیر باچله ضرب ایدر و صو کره ینه حبس ایلردی
 عباسیلر زماننده مشارالیه امام اعظم حضرتلری حضرت حسنک
 اولادندن (نفس زکیه) دینکله معروف محمد مهدی به معاونت و بیعت
 اولونماسنه وزکات، اغنام و عشر کبی شرعی ویرکولرک اوکا ویرلمس
 کیزلی کیزلی قتوالر ویرردی. بونک ایچوندرکه عباسیلرک ایکنچو
 خلیفه سی اولان (ابو جعفر منصور) طرفندن حبس ایدلمش ونهایت
 حبس خانهدن دروننده وفات ایلشدر.

فقهای حنفیه نک شیخ واستاد لرندن و اصول فقه امام لرندا
 «جصاص» لقبیلهدن شهرت شعار امام ابوبکر رازی نک (احکام القرآن
 نامنده کی تفسیرنده و فخرالدین رازینک تفسیر کیرنده و مشهور (تفسیر
 کشاف) ده، دمین ذکر ایتدیکم (لاینال عهد الظالمین) آیت جلیله سنده
 تفسیرنده بوصورتله محرردر. کذا بویوک مجتهد لرندن هربری امام اعظم
 کبی بر مذهب فقهی صاحبی اولان سفیان ثوری، ابن جریج و عباد
 کثیر کبی امام اعظم امت دخی ذکر اولونان منصور طرفندن حبس
 ایدلمشدردی. مذهب مالکی مؤسس امام مالک حضرتلری یالکنز دایا

کبی عالی بر دین ، بویله بر سلطنت قاهره ی قبول ایدرمی ؟ عادل مطلق
اولان جناب حق (لایزال عهدی الظالمین) بویوریور . بویله قاهره و مستبد
بر حکومتی دین اسلامه نسبت ایدرک آدینه «خلافت اسلامی» دیمک
یار واغیاره قارشی اسلامیتی تحقیر اولور . بو نوع حکومتلر خلافت
دکل حضرت رسالتناه اقدمزک بویوردقلری کبی ایصیریجی سلطنتدن
عبارتدر . آنک ایچوندرکه رسالتناه اقدمز غائبدن خبر ویرمک
صورتیله بر معجزه قیلندن اوله رق (بندن صوکره خلافت اوتوز
سنه در ، آندن صوکره ملک عضو اولور) بویورمشلردر . حقایق
تاریخیه ده بونی مؤیددر . تاریخ تدقیق و تتبع ایدیلیرسه کورولورکه
حقیقی خلافت خلفای راشدینک صوکنجیسی اولان حضرت
علینک وفاتیه ویاخود حضرت حسنک آتی آیدن عبارت بولنان مدت
امامتیه ختام بولیور . آندن صوکره آرتق (الحکم بان غلب) قاعده سی
جاری اولیور . سوز قیایجه ، قوته انتقال ایدیور . بو صورتله
حضرت پیغمبرک (ملک عضو) توصیفیه افاده بویوردقلری حقیقه
ایصیریجی سلطنت قاهره تأسس ایلور .

بوراده استطراد قیلندن بر غربیه ذکر ایتمک ایستهرم . علامه
تفتازانی نامیه مشهور بر ذات واردرکه جمله کزک بیلدیکی بر ذاتدر .
عنوانندن آکلاشیلیدی و جهله بویوک بر عالمدر . فقط تاریخ اسلامه
احوال علمانک تراجمه حقیقه واقف اولمادینی آکلاشیلیور . بو ذات
(شرح عقائد) دنیلن کتایبده (اثمه دیندن اهل حل و عقد خلفای
عباسیه نک خلافتنده اتفاق ایتمشلردر) دییورکه دوضرو دکلدر . حقیقت
تاریخیه یه کلیاً مغایردر . بیلیرسکیزکه امام اعظم ابو حنیفه حضرتلری
اثمه دینک اک بویوکلر ننددر . ۸۰ تاریخنده تولد و ۱۵۰ تاریخنده وفات

ایتمه دکلری ظلم و سفاقت ، اولاد پیغمبری به روا کورمه دکلری جور و شناعت قالمشدر . دولت عباسیه ایسه بوتون بوتون ظلم و اعتساف ، قهر و تغلب اوزرینه تأسس ایتمشدر . یالکز مشهور (ابو مسلم خراسانی) نك حکومت امویه طرفدارلرندن قتل و اتلاف ایتدیکی نفوسك عددی ۶۰۰،۰۰۰ نه بالغ اولمشدر . خلفای عباسیه نك برنجیسی اولان (سفاح) ك عموجیسی عبدالله بن علی شامی استیلا ایتدیکی زمان اهالی بی قتل عام ایتمش ایدی . برلنکده طعام ایتك اوزره دعوت ایتدیکی اشرافدن طقسان کشی بی صوبالره اولدورتدی . بعضیلری هنوز جان چکیشمکنده و خیر یلتیلری ایشیدلمکنده ایکن اوزرلرینه سفره قوردورارق بلاتاثر طعام ایتدی و شامده خلفای امویه نك قبرلرینی آچدیره رق بولدیغی نعشلری ، کیمکلری احراق ایله دی . بو عبداللهك برادری سلیمان بن علی ده بصره ده امویلردن الله کچنلری اولدوردی و جسدلرینی سوقاقلرده سوروتدوردی . صوکرده میدانده براقه رق کوپکله یدیردی . اك معتبر اسلام تاریخلرنده بو صورتله محرردر . حتی جودت پاشا مر حومك (تواریخ خلفا) نامنده کی تاریخته باقارسه کز سوزلریمك صدقنی تسلیم ایدرسکمز .

عثمانلی خلیفه لرینك ایسه سلطنته اولان حرص و طمعلرندن نیجا معصوم و بیکنه شهزاده قانی دوککلری معلومدر . خلفای راشدیر حضراتی ، بیت المال عائد اولان اموال دولت و ملت (مال الله) و حقوق عامیه (حق الله) تسمیه ایدرلر و بناء علیه علی العموم حقوقك حسر محافظه سنه صوك درجه یه قدر بذل مقدرت ایلرلر دی . بونلرایسه حقوق مسلمینی مصادره ایدرلر و اموال دولتی شوکا بوکا پیشکش چکرلر دی شمدی انصاف ایدلم؛ بویله بر ظلم و تغلبه خلافت دینه بیلیرمی؟ اسلامیه

حنفیلر (فتنه قتال و اختلال ملحوظ دکل ایسه عزل ایدلسی لازم اولور) دیورلور .
 بعضیلری (فقهای حنیفه عندنده عدالت صحت خلافتک شرطی دکلدر .
 بناءً علیه فاسقک خلافتی مع الکراهه صحیح اولور) دیمشلسدهده بو
 دوغرو دکلدر ، یا ککشددر . صدر الشریعه نک دمین اسمنی ذ کرایتدیکم
 (تعدیل الموم) نده و فقهای حنیفه نک صدر الشریعه درجه سنده
 محققلرندن اولان مشهور ابن همامک (مسایره) نامنده کی کتابنده صراحةً
 بیان اولونمشدر که ائمه حنیفه عندنده دخی (عدالت) صحت خلافتک
 شرطیدر . یالکیز ملک و سلطنتک شرطی دکلدر . یعنی شمدی
 آشاغیده ذ کرایده حکم خلافتک ایکنجی نوعک شرطی دکلدر .
 چونکه خلافتک ایکنجی نوعی حکمدارلقدن ، سلطنتدن عبارتدر .
 بوايسه انتخاب و بیعت اوزرینه مؤسس دکلدر . قوت ، قهر و غلبه اوزرینه
 مبتنیدر . بومقامده خلافتله سلطنتی بر برینه قاریشدیر ماق لازمدر .
 حقیقی خلافت بشقه ، صوری خلافت ، یعنی سلطنت و پادشاهلقینه
 بشقه در .

ایکنجی نوع خلافتله کانهجه : بوکا خلافت صوریه دیمشدک . بو
 صوره و ظاهراً خلافت شکننده ایسدهده حقیقتمده خلافت دکلدر .
 بلکه ملک و سلطنتدن ، تغلب و تسلطدن عبارتدر ، پادشاهلقدر . بو یا
 شرائط خلافتی جامع اولماق و یا خود قهر و استیلا ، جبر و اغلب
 طریقیه استحصال اولمقله اولور . بوتون محققین اهل سنتک متفقاً
 بیان ایتدکری بر حقیقتمدر که خلفای امویه و عباسیه نک خلافتی بو
 قبیلندر . چونکه بونلرک خلافتلری ملنک کندی آرزو و انتخابله
 حصوله کلمه مشدر ، قهر و استیلا ، جبر و تغلب طریقیه حاصل اولمشدر .
 تاریخ اسلامه آشنا اولانلرجه معلومدر که خلفای امویه نک ارتکاب

عالم اولسی کافی دکدر . اصول وفروعده مجتهد درجه سنده عالم اولوق شرطدر . فقط حنفیلر بو خصوصده مسامحه کار داوورانیورلر . حنفیلره کوره مجتهد اولوق شرط دکدر ؛ علی الاطلاق احکام شریعتی و مصالح خلافتی بیلیمک کافیدر .

بوراده (عدالت) شرطی بر آز ایضاح ایتمک اقتضا ایدیور . عدالتک اصطلاحده ایکی معناسی واردر . بری احقاق حق و ابطال باطل معناسیدر . ایکنجیسی سیرتده استقامت معناسندهرکه (فسق) ک ضدیدر . بو مقامده عادل دیمک . فاسق دکل دیمکدر . عدالتک بویکنجی معناسی برنجی معناسندن اعمدر . اوکاده شاملدر . شوخالده ظالم و غدار بر انسان خلافتده اهل اوله میه جنی کبی فسق و فجور ایله متصف اولان بر ذاتده خلافتده اهل دکدر . علمای اسلام ، ظلم و اعتساف ایله متصف اولان بر ذاتی خلیفه یا یق دیمک ؛ قورودی قویونه چوبان ایتمک دیمکدر دیورلر . بوندن اول (امامت) حقه جناب حق ایله ابراهیم علیه السلام آره سنده جریان ایدن بر مکالمه معنویه یی قرآن کریمدن نقل ایتشدم . اونده کندی ذریقتندن ده امام یاپیلماستی نیاز ایدن حضرت ابراهیم جواباً جناب حق (لایزال عهدی الظالمین) بوور سیور . یعنی (نیم عهد امامتم ظالملره واصل اولماز) دیور . ذاتاً خلیفه و امام نصب و تعییندن مقصد ظالمک ظلمنی دفع ایتمکدر . یوقسه ناس اوزرینه ظلمی مسلط ایتمک دکدر . بونک ایچوند که کاهه علمای اسلامه کوره ظلم و اعتسافکار بر ذاتی خلیفه انتخاب ایتمک جائز اولماز و صوکر . ارتکاب ظلم ایدن بر خلیفه ده بوتن علمایک انفاقیه عزله مستحق اولور . حتی باشده امام شافعی اولدینی حالده متعبدمین شافعییه کور . ملت طرفندن عزل ایدلمه مش اولسه بیله کندیلکندن منعزل اولور

یالکز علوم شرعیہ دہ دکل، زمانندہ موجود اولان بوتون علوم وفنونندہ
 ید طولی صاحبیدر . حقیقہً هر معناسیلہ علامہ در . (تعدیل العلوم)
 نامندہ کی کتابی اسمندندہ آکلاشیلدینی وجهله متعدد علملردن باحثدر .
 پک مدققانه یازلمش کزیدہ بر اثر در . بحث ابتدیکی علملردن بری دہ علم ہیئتدر .
 کندی الیلہ چیزلمش علم ہیئت اشکالی دخی حاویدر . مطالعہ ایدیلیرسہ
 صاحبک نہ بویوک عالم اولدینی تبیین ایدر . فقط مع الناسف شیمدی یہ
 قدر طبع ایدلمہ مشدر . یالکز یازمالری موجوددر . بو مناسبتله شو
 جہتی دہ عرض ایدہ یم کہ دین اسلامہ و شرقدہ بالجلہ علوم وفنونہ
 خدمت ایدن بویوک عالمک اکثریسی تور کدر . بن وقتیلہ بونلردن
 بمضیلرینک اسملربی، قیصہ قیصہ ترجمہ طالریلہ نشر ایتشدم . ایشته بو
 صدر الشریعہ دہ اونلردندر . مذهب حنفیدہ ۶۰۰ سسنہ دنبری اونک
 عیارندہ بر عالم یتیمشمہ، مشدر .

بو خلافت حقیقیہ مک شرطلرینہ کلنجہ بونلر اون قدر شرائطدن عبارتدر کہ
 شونلردر : مسلمان اولمق ، حر اولمق ، عاقل و بالغ اولمق ، ارکاک
 اولمق ، سلامت حواس و اعضایہ مالک بولونمق ، امور مملکت و مصالح
 ماتی تمشیتدہ رأی و تدبیر و حسن سیاست صاحبی اولمق و عین زماندہ
 خلق اوزرندہ نفوذ و قدرتہ مالک بولونمق ، شجاعت صاحبی اولمق ،
 نام معناسیلہ عدالتله متصف اولمق ، (قریش) دن اولمق . ایشته
 خلافتک شرطلری بونلردر . بونلردن بری اکسیک اولورسہ
 خلافت صحیح اولماز . بو شرطلردن باشقہ بردہ (علم) شرطی
 واردر . یعنی خلیفہ مک عالم اولمسی شرطدر . فقط بو شرطدہ علمای
 اسلام ایکی قسمہ آیریلیورلر . (مواقف) دہ صراحۃً بیان ایدلایکی
 اوزرہ جمهور علمای اہل سنتہ کورہ خلیفہ اولہ حق ذاتک علی العادہ

منعزل اولماز، عزل ايدملك لازم كلير ديورلر. مع هذا بو درت مذهبك دردی ده خلافتك شرائط اساسیه سنده مثلاً خلیفه نك عالم و عادل اولمسند ه اتفاق ایدیورلر. عالم و عادل اولمايان بر ذاته خلیفه دیمیورلر. ملك و سلطان دیورلر.

علم اعتقاد کتابلرینی تدقیق ایدرسه كز كورورسكزكه علمای اهل سنت خلافتی ایکی قسمه آیریورلر. برینه خلافت حقیقیه، دیگرینه خلافت صوریه دیورلر. خلافت صوریه یه خلافت حکمییه دخی اطلاق اولئور. شمعی بو ایکی نوع خلافتی آیری آیری ایضاح ایدیم. شویله كه خلافت حقیقیه شرائط لازمه سنی جامع و ملك انتخاب و بیعتیله حاصل اولان خلافتدر. ایشته اصل حقیقه و شرعاً (خلافت) دییه بو برنجی نوع خلافته دینور. ایشته دمین سویله دیکم (سندن صكره خلافت اوتوز سنه در. آندن صكره ایصیریجی سلطنته منقلب اولور) مألنده کی حدیث شریفده ذكر اولئان خلافتدن مقصوده بو خلافت حقیقیه در. حنفی علماسنك اك بویوك محققلرندن اولان وبو کون دخی اثرلری بوتون عالم اسلامده تدریس ایدلمكده بولئان صدر الشریعه نك (تعدیل العلوم) نام کتاب كزیندنه بو خلافت حقیقییه (خلافت نبوت) اطلاق اولئور.

حنبلی مذهبنك اك بویوك مجتهدلرندن بولئان مشهور ابن تیمیه نك (منهاج السنه) سنده دخی بو صورتله محرودر. یعنی ابن تیمیه دخی بو خلافت حقیقییه خلافت نبوت اطلاق ایدیور. نته كم او حدیث شریف دیگر برروایتده (خلافة النبوة ثلاثون سنة إلخ..) طرزنده وارد اولمشدر. شیمدی اسمنی ذكر ایتدیکم صدر الشریعه تور کدر. بخار ایدره. ۷۴۷ تاریخنده بخاراده وفات ایتمشدر. زماننك اك بویوك عالملرنددر.

کوریلپور که اصحاب کرام حضراتی ده بو خلافت مسئله سی صورت
صریح ده ایضاح ایتمه مشلردر . دیمک اولیور که نه قرآن کریم ده ، نه احادیث
نبویه ده . ونه ده اصحاب کرامک کلاملرنده خلافت حقنده بزم آرادیمز ،
او کر نمک ایسته دیکمز مسئله لری بزه آکلانه حق ، صریح و قطعی بر
صورتده ایضاح ایده جک بر شی یوقدر .

شمدی ده صکره کلن علمای اسلامک بو مسئله حقنده بی طرز
تلقیلرینی تدقیق ایدم . بیلسکیز که بو کون اهل سنت دوغروندن
دوغرویه شهراه اسلامیتده کیدن ، صراط مستقیم اوزرنده بولنان
دورت مذهبدن عبارتدر . حنفی ، شافعی ، مالکی و حنبلی مذهبلی
دکلی افندم ؟ ایسته بو دورت مذهبک هیئت مجموعهنه اهل سنت دینیر .
صراط مستقیم بونلرک کیتدکلی یولدر . بو ذاتلرک تلقیسنه کلنجه
بوراده اوج مذهب بر طرفه ، بر مذهب دیگر طرفه آریلیر . مالکی ،
شافعی ، حنبلی مذهبلی متفقاً خلافتک شرطلرنده آغیر داورانیرلر .
خلیفه اوله حق ذاتک مجتهد درجه سننده عالم اولماسنی ، تام بر عدالتله
متصف بولونماسنی و هر حالده (قریش) دن اولماسنی شرط ایدرلر .
حتی امام شافعی حضرتلری (خلیفه طریق عدالتدن انحراف ایدنجه
کندیلمکدن منعزل اولور . آریجه خلع وعزله توقف ایتمز) دییور .
مذهب شافعی ده بویله در . اک معتبر شافعی کتابلرندن اولان (منهاج
نووی) ده و آنک شرحی اولان (مغنی المحتاج) ده بو بابده صراحت
واردر . مراق ایدنلر ، سوزیمه اعتماد ایتمینلر ، بو کتابله مراجعت
ایسونلر . بالکیز حنفیلر شرائط خلافت حقنده بر آز مسامحه کار
داورانیرلر . مثلاً خلیفه نک مجتهد اولماسنی شرط دکدر . عالم اولماسنی
کافیدر دییورلر . کذلک خلیفه طریق عدالتدن انحراف ایدنجه کنیدیلمکدن

« عثمان ، علی ، عبدالرحمن بن عوف ، زبیر بن العوام ، طلحه ، سعد بن وقاص » دن مرکب مجلس مشورته ترك ایتدی . اولورده کندی ایجلا رندن برینی انتخاب ایتک اوزره عبدالرحمن بن عوفی حکم اتخاذ ایتدیلر . اوده حضرت عثمانی ترجیح و انتخاب ایتدی . حضرت عثمانک معلوم اولان شهادتندن صوکره حضرت علی یه بیعت اولوندی . ایشته بو درت خلیفه یه خلفای راشدین دینورکه بونلرک مجموعتک مدت خلافتی اوتوز سنه دن عبارتدر .

حضرت پیغمبرک بوبابده بر حدیث شریفی واردرکه بوراده بیلنمسی لازمدر و جالب دقدر . او حدیث ده (الخلافة بعدی ثلاثون سنة ثم تصیر ملکاً عضواً) در . معناسی بندن (صوکره خلافت اوتوز سنه در . اولندن صوکره ایصیریجی سلطنته منقلب اولور) دیمکدر . (عضوض ایصیریجی دیمکدر) بو حدیث الک معتبر حدیث کتابلرندن اولان (سنن ترمذی) ده و بوتون عقائد کتابلرنده موجوددر . بعضیلری بو حدیثی ضعیف عد ایتک ایستبورلر سده دوغری دکدر . (حدیث حسن) نوعندندر . حدیثلراوچ قسمدر . برنجیمی حدیث صحیح ، ایکنجیمی حدیث حسن ، اوچنجیمی ده حدیث ضعیفدر . بونلر اصطلاحدر . اصول حدیث اصطلاحاتندر . ایشته بو حدیث ایکنجی نوع حدیثلردندر واک معتبر علم اعتقاد کتابلرنده مذکوردر . رجا ایدرم ، سوزلرمده قطعاً غل و غش یوقدر . کیمسه یه مداهنه وریا یوقدر . مقصدم اسلامیتک حقایقنی بیلدیرمکدر . بو ایضا حاقمی صرف اسلامیته خدمت ایچون سویلیورم . دین اسلامی بر طاقم خرافاتدن تنزیه ایچون سویلیورم . (براو و سسلری ، آقیشلر) ایصیریجی سلطنتدن مقصد سلطنت ظالمه در . مجاز طریقله سویلنمشدر . استعاره واردر .

امیر المؤمنین تعبیری بورادن چیقدی . صو کره بیلور سکنر حضرت
 عمر یارالاندی . کندیسى مجروحاً حال احتضارده ایکن باشنده پك چوق
 خلافت کورولتوسی اولدی . بر جماعت کله رك حضرت عثمانى ولی عهد
 یاماسنى ایسته دیلر . حضرت عمر قبول ایتدی . بن عثمانى خلیفه یاپار سه م
 (امیه) اوغللرینی امت محمدك باشنه مسلط ایدر اونلرده اونك بوینی
 اورور دیدی . نته کم او یلده اولدی . اونلر حضرت عمرك نزدندن
 چیققدن صو کره هاشیمیلر کلدیلر . حضرت علینك خلیفه یاپیلما سنى
 ایسته دیلر . حضرت عمر اونى ده بکنمه دى (حضرت علی ، الله آدمیدر
 بن آنى خلیفه یاپار سه م اوسزى دوزو یوله سوق ایدر ، فقط طبعینده
 مزاح یعنی لطیفه جیلک وارد) دیدی و یامادی . بعضیلری ده عشره
 مبشره دن مشهور حضرت طلحه بنی ولی عهد یاماسنى توصیه ایتدیلر .
 حضرت عمر جواباً (اوجیجیلی یجلی سوسلو الیسه لر کیمه سنى بیلیر ،
 اومى خلیفه اوله جق ؟) دیدی . بر قسم خالق ده ینه عشره مبشره دن
 (زبیر بن العوام) ی توصیه ایتدیلر . حضرت عمر (او چارشو و بازار لرده
 اولچك باشلرندن قالقماز) جوابی ویردی . نهایت بعضیلری ده
 حضرت عمرك کندى اوغلى علمای اصحابدن مشهور (عبدالله بن عمر) ی
 توصیه ایتدیلر . بو عبدالله ابن عمر حقیقهً اکبویوک علمای اصحابدندر .
 عابد ، زاهد ، متقی بر ذاتدر . هر وجهله خلافته لایق ایدی . اونك ایچون بعض
 اصحاب کرام حضرت عمره اونى توصیه ایتدیلر . ایکن جناب عمر (برأودن
 بر قربان کافیدر) دیدی . الحاصل حضرت عمر اصحاب کرام ایچنده کندى
 ایسته دیکی کبی خلیفه اوله جق بر ذاتی بولامادی و یا خود بو مسئولتی
 در عهده ایتك ایسته مدی . دوشوندی دوشوندی نهایت بیلدی ککن
 وجهله ایشی آتی کشیدن مرکب (شورا) یه حواله ایتدی . یعنی

کمی بو خصوصه هیچ رتوصیه ده دخی بولنماشدر. کرچه شیعیلر حضرت امام علی حقده، بعض اهل سنت ده حضرت ابوبکر حقده نص شرعینک وجودنی ادعا ایدیورلر. لکن جمهور اهل سنته کوره بوا دمالر دوغری دکدر. اصحابدن هیچ بری حقده کافی درجه ده نه جلی، نه ده خفی هیچ بر نص وارد اولماشدر. اگر وارد اولسه ایدی اصحاب کرام حضراتی کیمک خلیفه نصب و تعیین ایدیله جکی حقده تندی آرالرنده اختلافه دوشمزلردی. حالبوکه ارتحال نبویدن سوکره اصحاب کرام، ایچلرندن برنی خلیفه انتخابی خصوصنده اختلاف ایتدیلر. (سقیفه بنی ساعده) دنیان محله اجتماع ایدرک آره لرنده خیلی مناقشه جریان ایتدی. آجی، طاتلی سوزلر سوبلندی. مدینه لیلر مککیلره بزدن بر امیر سزدن ده برامیر اولسون دیدیلر. مککیلر (بزدن امیر، سزدن وزیر) دییه جواب ویردیلر. نهایت حضرت ابوبکره بیعت اولوندی. و (خلیفه رسول الله) دنیلدی. حتی اسم طابق خصوصنده اولا تردد ایتدیلر. حضرت ابوبکره نه اسم ویره جکلرینی، نه صورتله خطاب ایده جکلرینی بر دبره کس دیروب آتامادیلر. نهایت دیدیکم کبی خلیفه دیدیلر. حضرت ابوبکر آخر عمرنده حضرت عمر الفاروقی استخلاف یعنی ولی عهد تعیین ایتدی. اصحاب کرام ده قبول ایلدی واولا حضرت عمره تابع اضافتله (خلیفه خلیفه رسول الله) دیدیلر. رسول اللهک خلیفه سنک خلیفه سی دیمکدر. چونکد دیمشدم یا، خلیفه خلف دیمکدر. عمر، ابوبکرک خافی، ابوبکرده جناب پیغمبرک خلفی دیمک اولیور. فقط بو صورتده اضافتله آنجی، یدنجی، خصوصیه اونجی، یکرمنجی درجه یه بالغ اولونجه پک زیاده اوزایه جغندن تابع اضافندن واز کچریلر. علی الاطلاق خلیفه دیدیلر. آره سرده (امیر المؤمنین) اطلاق ایتدیلر. ایشته

نصل نصب و تعیین اولنور ؟ خلافتك شرائطی نه در ؟ هر حال و كارد .
و هر زمانده بر خلیفه نصب و تعیین ایتك ملت اوزرینه واجبمیدر ؟ کی
مسئله لر حقنده نه قرآن کریمده ، نه ده احادیث نبویه ده برصراحت یوقدر .
افندیلر ، نظر دقتكزی جلب ایدرم ؛ طیرناق كسمك ، صقال برافق كی
اك فرعی و آداب و عاداته ، امور صحیه مه متعلق مسئله لر حقنده بر جوق
حدیث شریف لر وارد اولدینی حلاله خلیفه لك نصل نصب و تعیین ایدیله حی ،
خلافتك شرطلرینك نه دن عبارت اولدینی و هر زمانده خلیفه نصب
و تعیین ایتك واجب اولوب اولمادینی حقنده صریح و قطعی هیچ بر حدیث
یوقدر . بونك حكمتی نه در ؟ آداب و عاداته دائر بر جوق حدیث لر
وارد اولسونده ییچون خلافت مسئله لر ی حقنده صریح بر حدیث شریف
وارد اولماسون ؟ بونظر دقتی جالب دلیلدیر ؟ بونك سببی شودر كه خلافت
اویله ظن اولدینی كی مسائل اصلیه دینه دن دكلدر . سیاسی بر مسئله در .
زمانه ، صرف و عادته كوره دكیشیر . ایجابات زمانه نایبدر . آنكه
ایچوندر كه رسالتپناه افندیز دین سویله دیکم خلافت مسئله لر ی حقنده
اختیار سكوت بو یور مشلدرد .

واقعا خلافت حقنده هیچ ده حدیث شریف یوق دكلدر ، وارد .
فقط بوبابده وارد اولان حدیث شریف لر (اماملر قریشدن اولور ،
بر زمانده ایکی خلیفه یه بیعت اولندقدده دیکرینی یعنی ایکنه بیعتی کیم
اولورسه اولسون اولدیریكر) كی ایکی اوج حدیثدن عبارتدر . بونلر
ایسه خلیفه لك صورت نصب و تعییننه و شرائط خلافتده دائر اولان
مسئله لر ی حل ایتكه کافی دكلدر .

الحاصل رسول اکرم افندمن حضرتلری امر خلافتی تماماً امتنه
ترك ایتمشدر . حین ارتحاللرنده كندیلرینه بر خلیفه نصب و تعیین ایتمه دكلری

قره سی مبعوثی محترمی ثریا بك افندی برده « امارت » دن «
 « امیر المؤمنین » تعبیرندن بحث ایستی . فقط بوتعبیرك بوبحشه تعلق و بك
 او قدر دكری یوقدر . امیر ، آمر دیمكدر . صفت مشبهه در . هر حكمداره
 امیر اطلاق اولنور . مثلاً افغان امیری دیرز . ایشته قرآن کریمده
 خلافت ، امامت و یا خلیفه و امام تعبیرلری حقنده کی آیتلر بونلردن
 عبارتدر و برده قرآن علی الاطلاق انسانلر حقنده ده « استخلاف »
 تعبیری قوللانیور . امر عدالته استخلاف دیمكدر . قرآنده بونلردن
 بشقه آیت یوقدر . بوراده علمای کرام حضراتی وار . بشقه آیت وار میدر
 افندیلر حضراتی ؟

[خلیل خلقی افندی (سعد) — خایر !]

[ضیاء الدین افندی (ارضروم) — حدیث شریفلر واردر . اجماع امت

واردر .]

عدلیه و کیلی سید بك (دوامله) — اوت اونلردن ده بحث ایده حکم .
 معلومدر که اسلامیتده قرآن متن شریعتدر . حدیثلرده شرح شریعت
 دیمكدر . فقط حدیثدن مقصد حجج اولان حدیثدر . چونکه بوگون
 کتابلرده موجود اولان ، لسانلرده دوران ایدن حدیثلرك بر قسمی
 یالاندر . موضوعدر . سوکره دن اویدورولمشدر . بر قسمی ده ضعیفدر .
 بویله مهم مسئله لرده قیمت علمییه سی یوقدر . احتیاجه صالح دکلدر .
 آنک ایچون حدیث دیوب کچمك دوغرو اولاماز . اونی تدقیق ایتك
 حدیثلرك هانکی قسمنده داخل اولدیغنی آکلامق واجبدر .

اولجده سویله مشدم . خلافت مسئله سی دینی اولمقدن زیاده دنیوی
 و سیاسی بر مسئله در . دوغرو دن دوغرویه ملتك کندی ایشیدر . اونك
 ایچوندر که نصوص شرعییه بو مسئله حقنده تفصیلات یوقدر . خلیفه

ایضاح ایده‌یم: خلافت، لغتده خلف اولق دیمکدر . خلیفه‌ده خلف دیمکدر . شو حالده حضرت داود علیه‌السلام خلیفه‌در . یعنی خلفدر . کیمک خلفیدر؟ اللهم خلفیدر . زرده خلفیدر؟ اجرای عدالتده، احقاق حق و ابطال باطلده دیمکدر . امام تعبیرینه کلنجه، امام پیشوا و مقتدابه دیمکدر، او کده کیدن دیمکدر . بونک ایچوندر که محله اماملرینه‌ده، جامع اماملرینه‌ده امام دینور . خلیفه‌یه‌ده امام المسلمین دینور . حتی بر مسلك علمیده پیشوا اولان اک بویوک عالم‌ده امام دینور . امام اعظم ، امام شافعی کبی بویوک عالم‌ده امام دینمی بوندندر . بو کلمه‌لرده معنای قدسیت یوقدر .

[یحیی غالب بك (قیرشهر) — شو عظمتیه باق های الله سندن راضی اولسون .]

[خلیل خلقی افندی (سعدی) احادیث شریفه‌یه‌ده کچیکیز ! .]
سید بك (دوامله) — مساعده بویوریکیز اگر دها قیسه کسمکلمی ایسترسه کز اختصار ایده‌یم . « خابر خابر سسلری ، بنده کز بش اون کوندن بری قونوشدینم رفقای کرامدن آلدینم حسیاته کوره ذهنلرده بعض شهرلر واردر . اونلری‌ده المدن کلدیکی قدر حل ایتک ، ازاله ایتک ایسترم . آرمیه لاف قاریشیرسه کلامک انسجامنه ، سلسله محاکمه خلل کلیور » دوام، دوام سسلری،

خلیفه تعبیریه امام کلمه‌سی آره‌سنده عموم و خصوص مطلق واردر . خلیفه اخص ، امام اعمدر . یعنی هر خلیفه امامدر . فقط هر امام خلیفه دهلدر . خلیفه‌لره امام دیندیکی کبی حقیقی خلیفه اولمالان پادشاهلرده امام دینور . آنک ایچون بو ایکی کلمه آره‌سنده کی فرقه دقت ایتلیدر . ینه آنک ایچوندر که کتب اسلامیه‌ده بو بحث « امامت » عنوانی آلتنده یازلمشدر .

حضرت پیغمبر حقنده و یاخود صکره کله جک اولان خلیفه لر حقنده
وارد اولامشدر . انبیای سالفه حقنده وارد اولمشدر . بر آیت
جليله ده « یا داود انا جعلناک خلیفۃ فی الارض فاحکم بین الناس
بالحق » بویورولمشدر . معناسی « یا داود بز سنی یر یوزنده خلیفه
یابدق ، بناءً علیه انسانلر آره سنده حق وعدل ایله حکم ایت » دیمکدر . علم
اصول فقهه و ادبیات عربیه به آشنا اولانلر بیلیرلرکه بو آیت جليله ده
حقه مقارن حکم یعنی عدالت ، فاء تعقیبه و تقریبه ایله خلافتیه تردیف
اولونیور . یعنی « سنی خلیفه یابدق او حالده ، او یله ایسه حق ایله
حکم ایت » دینیور . ایشته بوندن آکلاشیلیرکه خلافتدن مقصد توزیع
عدالت قضیه سیدر . احقاق حق و ابطال باطل قضیه سیدر . حقوق
ناسی صیانتدر . ایشته خلیفه نک وظیفه سی بو مقصد و غایه یی استحصاله
چالشمقدرکه حکومت وظیفه سیدر .

قرآن کریم ابراهیم علیه السلام حقنده ده « امام » تعیری قولا نیور .
قرآن ، بر آیت جليله ده جناب حق ایله حضرت ابراهیم آره سنده چکن
بر مکالمه مغنویه یی حکایه ایدیور . جناب حق حضرت ابراهیمه خطاباً
دیورکه « انی جاعلک للناس اماماً » یعنی « بن سنی ناسه امام یاییورم ،
یاخود « یاپه جنم » بویوریور . حضرت ابراهیم ده « قال ومن ذریتی » یعنی
« یارب ذریتمندن ده یاپ » دیه نیاز ایدیور . بونک اوزرینه « قال لاینال
عهد الظالمین » خطاب عزتی وارد اولیور . یعنی جناب حق حضرت
ابراهیمه جواباً « بنم عهد امامتم ظالملره واصل اولماز » بویوریور .
ایشته بو آیت جليله دن یک واضح اولارق آکلاشینورکه جناب حق
نظرنده او یله ظلم و اعتسافدن عبارت اولان ملک و سلطنت اصلا مشروع
دکدر . شمدی بویکی کله نک یعنی خلیفه و امام تعیرلرینک مغالرینی

دیگر له اعتبار لفظك عموم وشمول نه در. سبب نزولك خصوصیت نه دطدر
 دینیر. بو اعتبار له ذکر اولنان آیت جلیله دوغرو و ددو غرویه اهل اسلامك
 اداره مملکتده اتخاذ ایتمه لری لازم کلن خط حرکتلری کوستریور
 دنیه بیلیر. شبه یوقدر که ستایش الهیه مظهر اولان بر خط حرکت ،
 اسلام ایچون لازم الرحایه بر حرکتدر. خلاصه : مشورتله ایش
 کورمک ، تقدیر الهیه مظهر اولان بر کیفیتدر. نصل که بوتون عالم
 مدیت ده بوکون بواصول مشورتی قبول ایتمشدر. بزده آکاتوفیقاً اتخاذ
 مقررات ایدیوروز. افرادك حقوقی ، مملکتك سلامتق الذیاده کافل
 اولان اصول اداره ده بودر .

قرآنده ذکر اولونان ایکنجی دستورده اولی الامر طاعت
 دستوریدر. قرآن کریمده «اطيعوا الله واطيعوا الرسول واولی الامر منکم»
 آیت جلیله می واردر. معنای منیفی آلهه و پیغمبره و سرك ایچکزدن
 امر صاحبی اولانله طاعت ایدیکز دیمکدر. ایشته بوایکنجی دستوردر.
 بوده ، آنارشیی، حکوم تسزلیکی رفع و دفع ایتک ایچوندر. ضبط
 و ربط مملکتی تأمین ایتک ایچوندر که اوامر حکومتیه اطاعتك دیناً
 واجب اولدیفنی بیان ایدیور. بو آیت افراد صلاحیتدار اولان
 رجالك اوامرینه طاعت خصوصنده بر وظیفه دینه تحمیل ایدیور.
 ایشته اداره مملکت خصوصنده قرآن کریمده بو ایکی آتدن بشقه
 بر آیت یوقدر. واقعا اماناتی یعنی مأموریتلری ، وظائف حکومتی
 اهلنه تودیع ایتک ، حق وعدله رعایت ایلهمک کی خصوصاته متعلق
 آیات قرآنیه واردر. لکن بونلر دوغرو و ددو غرویه اصول ادارهیه
 متعلق دکدر. ایکنجی درجه ده در .

قرآن کریمده «خليفة» و «امام» تعیرلری واردر. فقط بونلر

نقطه‌ی عرض ایدیم که خلافت حکومت دیمکدر . دوغرودن دوغروییه ملت ایشیدر . زمانک ایجاباتنه نابعدر . آنک ایچونددر که رسالت‌پناه افندیماز ارتحال نبویلرنده اصحاب کرام حضراتنه بو خلافت مسئله‌سی ایضاح ایتمه‌مشلردر . شدتلی بر حرارت ایچنده ارتحال ایتمه‌ملردی . بر آره‌لق « بکا قلم کاغد کتیریکنز؛ سزده‌بض وصایاده بولونمق ایسترم » دیمشلردی . بعض اصحاب در حال قلم کاغد کتیرمک ایسته‌دیلسرده حضرت عمر مانع اولدی . شدت حرارتدن صایقه‌لایور دیدی . بزه کتاب الله کافیدردیمشدی . بونک اوزرینه بر آز کورواتو اولدی . حضرت پیغمبر « کورولتو ایتمه‌ییک دیشاری چیقک بنی‌بالکنز براقک! » بویوردیلر . آندن صو کره شق شفه ایتدیلر . ظن ایدرسه‌م او کون ویا ایرتسی کونی وفات ایتدیلر .

محترم افندیما! اصل قانون دین اولان قرآن کریمه مراجعت ایدرسه کنز کورورسکنز که بزم شکل خلافت حقنده یعنی اسلام خلافتی حقنده هیچ بر آیت کریمه یوقدر . قرآن کریم امر حکومتده یعنی اداره مملکت خصوصنده بزه ایکی دستور کوستریبور . بری بو کون عالم مدینتده جاری اولان قاعده‌مشورتدر که بونی قرآن بزه بیک اوچوزسنه اول وضع ایتمشدر . اوده (وامرهم شوری ینهم) دستوریدر . مسلمانلرک ایشی کندی آرالرنده مشورتله کوریلوردیمکدر . کرچه بو آیت جدیله مدینه اهالیسی حقنده نازل اولمشدر . مدینه‌لیلر کندی امور مشترکه‌لرینی مملکتلرینه عائد اولان ایشلری کندی آرالرنده مشورتله رؤیت ایدرلر مش . حضرت قرآن اونلرک بو حافی تحسین ایدیور . دیمک که اداره مملکت خصوصنده اصول مشورت تقدیر الهی به مظاهر اولان مستحسن بر اصولدر . بر قاعده اصولیه وارددر . خصوص سبب عموم لفظه مانع دکلددر . تعبیر

امامده حجه ، حجت بابہ ، بابده مؤمنه تعلیم ایدر دیرلر . اونک ایچون بونلره « تعلیمیه » فرقهسی نامی و بریلیر . بونلرجه قرآن کریمک هم ظاهر ، همده باطن معناسی وارد . مقصود اولان معنای باطنیسیدر دیدکلری ایچون بونلره « باطنیه » دخی دینلیر . بونلرک اعتقادلری سراپا خرافاندن عبارتدر . حدذاتنده بونلردینسزدلرلر . الک جریرزهلی و جین فکریلری ریشلری مشهور « حسن صباح » در . بو آدم شرق ساجوقیلرندن آلپ آرسلان زماننده « قزوین » جهتلرنده یوکسک بر طاغ باشنده « آله مود » قلعه سنده تحصن ایتمش ایدی . آلپ آرسلان بونکله چوق اوغراشمشدی . ایوم آناتولی داغلرنده تخته جیقله ، اودونجیقله اشتغال ایدن بر قسم اشخاص بو باطنیه فرقه سنک بقایا سیدرلر . فقط بونلر آرتق کندی مذهبیلرین اونونمشدرلر .

ایرانده ایوم ساکن بولنان « امامیه » فرقهسی ده « مهدی » نک وجودینه قائلدرلر . بونلره کوره مهدی بر حیاتدر . مناسب بر زمانده ظهور ایدمک ، بوتون دنیایی عدل و حق ایله دولدوره جقدر . ایشته بونلر و بوکی فرقلر بو خلافت مسئلهسی حقنده درلو درلو خرافاته قائل اولمشلردر . آنک ایچون اهل سنت علماسی کندی اعتقاد کتابلرنده « امامت » عنوانی آللنده خلافت مسئلهسی موضوع بحث ایتمشلردر . مقصدلری بو مسئله اطرافنده دونن خرافاتی رد و ابطال ایتمکدر . یوقسه خلافت مسئلهسی بر اعتقاد مسئلهسی اولمق اوزره بیان ایتمک دکادر . نته کیم اهل سنت علماسی ، دمین دیدیکم کی بو جهتی صراحةً بیان ایدرلر . اوילה دکلی افندیلر ؟ (اويله در ، دوغرو در صدالری) بو جهتلر بو صورتله بیلندکدن صوکره شمیدی ده خلافت مسئله سنک اصل ماهیت شرعیه سی ایضاح ایدهیم . هرشیدن اول شو

بونك ایچون اذهاند، افکارده شبهه لر، تردد لر بولونماق لازم کلیر. مسئله یی بیلرک حل ایتک ایجاب ایدر. کرک دینی جهتی و کرک سیاسی جهتی اطرافیه بزم بیلمه مز لازم کلیر .

بوجهت لری بیلر سهك نه بائق ایسته دیکمزی ، نه یا با جهمزی بیلمش اولورز. بنم اصل مقصدم مسئله نك دینی جهتی، اسلامیتك خلافت مسئله سی حقیقه کی طرز تلیسفی ایضاح ایتمکدر. سیاسی جهتی بیان، مقصدمدن خارجدر . بن اوکا قارشام ! اوجهتی ، مجلس عالی حل ایدر .

اول امرده شو جهتی عرض ایدیم که خلافت مسئله سی دینی اولمقدن زیاده دنیوی بر مسئله در و اعتقاد مسئله لرندن دکل ، ملت هائک حقوق و مصالح عامه جمله سندندر . اعتقاده تعاقی یوقدر . واقعا اعتقاد یانه دائر تألیف اولونان آثار اسلامیه ده دخی بوم مسئله دن اوزون اوزادی یه بحث اولونیور. فقط بو، خلافت مسئله سنک عقاعد اسلامیه دن معدود اولدینی ایچون دکل ، بلکه بوم مسئله اطرافنده صوکرده دن حاصل اولان بر طاقم خرافات و افکار باطله یی ابطال ایچوندر . بو نقطه یی علمای اسلام کتابلرنده صراحة بیان ایدر لر . بیلر سکز که عصر سعادتدن صوکره عالم اسلامده مختلف فرقه لر و اعتقاد مذهبلری ظهور ایتمکدر . اولردن بری ده شعی فرقه سیدر . بوشعی فرقه سی بالآخره مختلف قوللره ، شعبه لره آیرلمشدر . بونلرک بر قسمنه « اسماعیلیه » فرقه سی دینیر وعین زمانده بوفر قیه « باطنیه » و « تعلیمیه » و « سبعیه » ناملری دخی ویریلیر . بونلر کندی خلیفه لرینه امام نامی ویریر لر و کندی اماملرینک الوهیتیه قائل اولور لر . امام علوم و معانی دوغروندن دوغرویه الله دن آیر دیر لر . امامدن صوکره « حجت » دنیان ذات کلیر . آندن صوکره « باب » ، آندن صوکرده « مؤمن » کلیر . الله امامه ،

محترم افنديلر !

مساعده بويوريرسه كز بنده كزده بو خلافت مسئله سي حقنده
بر آز ايضاحات ويريم . مسئله پك مهم اولديغندن وحق تاريخمزه
وبلسكهده بالعموم حادثات اجتماعيه آره سنده اك بويوك بر انقلاب ديمك
اولديغندن بوباده نه قدر سوز سويانسه ينه آذر . آنك ايچون صبري كزي
سوء استعمال ايدرسيم بي معذور كوري كز . بندن اولكي خطيبلر
خصوصيله اسكيشهر مبعوثي عبدالله عزمي افندي حضر تلري بوباده كي
قناعتي بيان ايتديلر . پك كوزل وپك صميمي سويله ديلر . بنده كزده بو
مسئله يه دائر اوزون سنه لر دنبري اجرا ايتديكم تتبعات نتيجه سنده حاصل
اولان قناعتي بيان ايتك ايستهرم . نته كم كچن سنه خلافت حقنده
(خلافت و حاكميت مليه) عنوانيله برده كتاب نشر ايتمش ايدم . ديديكيم
كي تاريخ اسلامده عظيم بر انقلاب ياپيورز . ديه بيليرم كه بوندن ده بويوك
انقلاب اوله ماز . بو انقلابك عظمتندركه ذهنلر بونكله پك مشغولدر .
ملر اندیشه و تردد ايچنده در . اونك ايچون جمله مزك وجدان واذعاني
رزو ايد ييور كه مسئله تاميله توضح ايتسون . يارواغيار نه ياپديغمزي ونه ياپمق
يستهديكمزي بيلسون . شعورلي ر صورتده مي ، يوقسه شعور سز بر حالده مي
بيورز ، آكلاسون . مجلس عالي ، خلافت مسئله سنك ماهيت شرعيه وسيا-
يه سفي بيله ركي اتخاذ قرار ايد ييور ، يوقسه بيلميه ركي ؟ بوجهتلر تاميله
وضح ايتسون . چونكه تكرار ايد ييورم مسئله حقيقه غايت مهمدر . عالم
سلامده دهاشمدي يه قدر بويله بر انقلاب واقع اولما مشدر . دكل عالم
سلامده ، بلكه كره ارضده واقع اولان انقلابانك اك بويوكي ، اك مهميدر .

DR
589
S48



1007411

نورکيه بوبوك ملت مجلسنك

۳ مارت ۱۳۴۰ تاريختده منعقد ايکنجي اجتماعده

خلافتك ماهيت شرعيه سي

حقنده

عدليه وکيلي سيد بك طرفدن ايراد اولنان نطق

Seyyid, Mehmed

Hilāfetin māhiyet-i
şer'iyesi



آئقرد

نورکيه بوبوك ملت مجلسي مطبعه سي

cf 18.11.66

DR
589
S48

Seyyid, Mehmed
Hilāfetin māhiyet-i
şer'iyesi

PLEASE DO NOT REMOVE
CARDS OR SLIPS FROM THIS POCKET

UNIVERSITY OF TORONTO LIBRARY

